





大明宣宗章皇帝實錄

宣德七年春正月辛酉朔

日有食之勅群臣曰朕以菲德君臨萬姓夙夜孜孜欽承

天道用伸昭事今茲正旦日有食之日衆陽之宗也正旦一歲之首也

上天示警厥係匪輕朕祇存惕厲用謹天戒君臣同體所宜協恭其免賀禮尔文武群臣即詣禮部護日如儀欽哉毋忽

壬戌



迤北和寧王阿魯台遣使臣也先帖木兒元者右  
衛頭目首勒等來朝貢馬 夜有流星大如鷄彈  
色青白有光出輿<sup>鬼</sup>西行入南河有彗出東方芒  
長丈餘尾掃天津漸東南行十日始滅

甲子

阿倫衛女直指揮同知亦省哥等來朝貢方物

丙寅

夜有流星大如盃色赤光燭地起梗河南行至角

丁卯

孟春享

太廟

遣中官祭司戶之神

賜永和王濟煥嫡子

名美鳩

遣中官李貴等使西域哈烈等國勅諭

哈烈沙哈盧鎖魯檀等曰昔朕

皇祖

太宗文皇帝臨御之日尔等恭事朝廷遣使貢獻始

終一心朕恭膺

天命即皇帝位主宰天下紀元宣德小大政務一體  
皇祖皇帝奉天恤民一視同仁之心前遣使臣齎書  
及綵幣往賜道梗而回近聞道路已通特遣內官  
李貴等齎書往諭朕意其益順 天心永篤誠好



相與往來同為一家經商生理各從所便賜以盧哈等金織文綺羅錦又勅撒馬兒罕頭目心魯伯曲列于及卜霞兒城達失干城沙魯海牙城賽藍城亦力把里討來思等處頭目亦如之悉賜金織文綺綵絹并勅哈密忠順王小荅失里忠義王脫歡帖木兒沙州赤斤蒙古二衛都督因即來都指揮察罕不花等等以兵護送直隸興州中屯衛奏去年十二月所給使臣車輛人夫之數上諭行在兵部尚書許廓等曰使臣經過應接煩勞今東作漸近須愛惜人力其令所過之處量度節省

戊辰

泰寧衛掌衛事都督僉事脫火赤奏舊印為胡虜本雅失里掠去請再給授從之

庚午 以大祀南郊

上御正朝文武群臣受誓戒禮畢

上御齋宮命內官內使各謹齋戒如有飲酒食葷及隨侍入壇而唾地者皆罪之令司禮監專糾察縱容者同罪

勅緣邊諸將嚴謹兵備凡關隘城堡墩烽晝夜不可怠忽寇至擊之寇去不必窮追



辛未

陝西平涼衛指揮僉事哈刺苦出遣百戶杰能等  
貢馬

癸酉 大祀

天地于南郊禮成 車駕還宮謁

皇太后畢出御正朝文武群臣行慶成禮

甲戌 以

郊祀慶成大宴文武群臣及四夷朝使 夜月掩

軒轅

乙亥

上元節賜文武群臣宴 朝鮮國王李禔遣陪臣

田時貴等貢馬賀 萬壽聖節 鎮守山西都督

僉事李謙奏虜寇竊入邊境官軍擊走之併獻所

斬獲人口首級及馬數 上謂行在兵部尚書許

廓曰朕嘗謂邊備當嚴密使賊無間可乘今彼得

乘間而入雖小勝抑末矣宜移文戒飭之

丙子

行在兵部奏兵馬司巡警不嚴盜於都城內詐稱  
校尉拘繫都督譚廣家屬劫財而去請付法司責  
令捕盜 上宥之榜諭許首告如例陞賞仍給犯



人財產如盜能自首亦免罪匿盜不首罪與盜同  
哈密衛回回副千戶克牙思子馬黑麻等來朝  
貢馬 行在戶部奏去年武進伯朱冕等運糧十  
五萬石往獨石後因冕奏停止未運四萬六千四  
百餘石今天氣漸暖請遣京衛軍士運之并運今  
年十五萬石 上從之命冕總督都督韓僖副之  
夜東北方雲陰有雷

丁丑

賜朝鮮國陪臣李歲等毛憐等衛女直指揮僉事  
互羊加等綵幣表裏等物有差 遂安伯陳英卒

英祖志四川重慶府巴縣人從 太宗皇帝靖內  
難積功封遂安伯英初襲故父春之職為燕山中  
護衛指揮僉事及志卒遂襲伯爵屢從征漠北後  
充總兵官鎮永平山海宣德元年召還掌前軍都  
督府事總右掖軍操備復鎮薊州山海五年往獨  
石雲州赤城永寧築城堡及還總右掖軍餽運邊  
糧至是卒賜祭命有司治墓如例英為人爽闓然  
在永平恣其貪酷人忿怨之

戊寅

賜建州左衛女直指揮同知佟塔察兒陝西岷州



衛僧鎖南鑽竹刺麻官著星吉烏思藏刺麻沙節  
捨嚴等鈔綵幣表裏紵絲襲衣有差 陝西行都  
司土官指揮僉事李文奏昨西番阿吉箴大國師  
吒思巴領占指揮同知星吉兒加等言洪熙元年  
領本簇刺麻阮丹汪刺鎖南藏卜等軍隨會寧伯  
李英至安定衛雅令闊之地討叛寇多所斬獲其  
有功者今皆陞賞阮丹汪東鎖南藏卜之功當為  
首而吒思巴領占不為陳奏二人不得與恩惠恨  
率所部亡入肅州鹽池境欲相讐殺今漸悔過復  
回君擺通川乞宥吒思巴領占不奏功狀之罪加

恩二人俾仍管番民辦納差發

上曰有功必賞朕所不容彼獨遺其功安得不生讐  
怨命所司陞賞如例 福餘衛都指揮安出等奏  
保本衛故指揮使晃火兒子孛羅帖木兒襲父職  
及頭目都魯禿脫歡义兒反里罕兀失哈刺帖木  
兒脫脫木兒忙哥脫脫不花俱為本衛指揮僉事  
孛羅谷不反脫脫俱為泰寧衛指揮僉事悉從之  
夜有流星大如碗色青白光燭地起中天北行  
有聲如雷

已卯



上以内官袁琦奸貪虐民既誅之勅天下諸司曰朕  
恭嗣

祖宗大位夙夜寅恭不遑暇逸誠以天下者  
祖宗之天下軍民安則天下治天下治而後有以仰  
副

祖宗付託之重爰自臨御以來惟以安人為心而內  
官監太監袁琦隨侍日久肆其狡險欺慢朝廷假  
幹辦公務為名朦朧奏遣內官內使在外凌辱  
官員毒虐軍民恣肆貪殘賍穢狼籍金銀以千萬  
計人不聊生所在官司坐視民患徒懷兢惕默不

敢言

天地不容神人共怒發其罪惡已勅法司榜示天下  
尔等其体朕恤人之心務隆綏撫民者國之本也  
代天理民者君為國安民者臣尔等勉之必使軍  
民皆安於下而無歎息愁恨之聲庶幾盡尔等之  
職不負朕委任之意尔等勉之 烏思藏東藏刺  
麻鎖南藏卜等來朝貢馬

庚辰

命行在刑部都察院進士分鞫獄囚舊例進士於  
各衙門觀政不食署文案至是都察院右都御史



顧佐言永樂中嘗命進士於刑部都察院理刑今  
欲仍令與御史郎中主事分理庶幾諳練從之  
勅甘肅總兵官都督僉事劉廣等曰瓦剌順寧王脫  
歡屢遣人朝貢雖其意勤然虜情多詐安知數數  
往來非窺覘欲有所為乎宜嚴飭兵備不可怠忽  
賜朝鮮國及迤北和字王貢使宴  
辛巳

詹事府少詹事兼翰林院侍讀學士曾棨卒棨字  
子啓江西吉安府永豐縣人永樂甲申進士第一  
授翰林院修撰時

上嚮用儒術命選新進士二十八人進學文淵閣以  
棨為首命光祿給朝夕膳月賜燈燭費使進於文  
學每燕閒召試棨率居第一必有賜賚脩永樂大  
典命為副總裁進侍講與修

太祖

皇帝實錄書成賜金織襲衣鈔幣進陞侍讀學士  
仁宗皇帝嗣位陞左春坊大學士仍兼翰林院侍讀  
學士

上即位優禮益厚賜寶帶修

太廟



仁宗實錄成賜金織襲衣文綺白金陞詹事府少詹  
事仍兼翰林院侍讀學士榮素有痰疾一日群臣  
班列奏事榮疾作遽退

上遙見之特免朝參越數月疾加命醫視療竟不起  
臨終神色不乱自為贊以遺素所厚者訃聞

上惻然遣禮部侍郎章敞賜祭贈<sup>嘉</sup>議大夫禮部左  
侍郎命有司治墳塋給舟歸其喪榮為人溫雅英  
邁喜推薦士士窮流落不遇者多賴以濟學博才  
贍為文章沛然莫禦無問貴賤幽遠求輒應之詩  
文布於四方善行草書得者咸貴之卒年六十一

壬午

勅大同總兵官武安侯鄭亨發軍士三千五百人  
委都指揮許斌領赴長安嶺宣府總兵官都督譚  
廣發軍四千人委都指揮毛翔領赴赤城俱聽武  
進伯朱冕等總督運糧免山西徐溝縣去年水  
灾田糧一千三百二十七石有奇穀草二千六百  
五十四束賜雲南順寧府故土官舍人猛蓋阿  
和等鈔行在都察院右都御史顧佐言徃者監  
察御史高舉巡按四川耐三司及行都司文牘數  
目十不及一復差御史馬駿言四川布政司連年



所奉六部文移止付各房勘合科不立案驗是以  
無從稽考經歷王徽等已問罪布政使甄實左叅  
政康慶右叅政田衡左叅議李敷俱合逮治  
上曰方面大臣承流宣化案牘本經歷之職今徽既  
受罪姑宥實等萬全左衛指揮使王祥奏本衛  
地臨極邊分兵守禦各隘傳報聲息惟資信砲在  
庫者俱已支用乞再闕給

上命工部以砲五百遣官軍送萬全給之右都督  
同知楊澤卒澤保定府定興縣人起卒伍從  
太宗皇帝靖內難以功累陞山西都指揮僉事永樂

二十年扈從北征陞右軍都督僉事洪熙元年陞  
都督同知至是卒訃聞賜祭加賻贈命工部治塋  
事

癸未

陝西文縣陽湯連南等簇番僧令占伯葉中央央  
等來朝貢馬賜迤北和寧王使臣也先帖木兒  
及兀者右衛頭目首勒等綵幣表裏絹帛有差仍  
遣都指揮僉事曹者赤帖木兒等賚勅及綵幣表  
裏賜和寧王阿魯台思南府奏所屬水德江長  
官司其地山溪陡峻無田耕種止辦戶丁折銀糧



三十八萬有奇近歲疫死者六十餘戶糧額未除  
皆見存之民代納又以鈔法不通市鎮舖店亦如  
例徵鈔巖洞深阻商旅不至市無交易皆受傭外  
境辦鈔輸官夷民艱難乞蠲免前項米鈔

上命行在戶部俱免之

甲申

特陞安定衛指揮同知果脫卜花為本衛指揮使  
初官軍征曲先叛寇果脫卜花為嚮道有所擒獲  
且招撫番人復業事平論功陞賞例以斬馘為上  
而果脫卜花止生擒賊一人于例不應陞數自陳

其指示招撫之功居多而都督僉事史昭為奏請  
行在兵部尚書許廓執奏以為例不應陞

上曰不聞蕭何發縱指示之功居諸將上乎彼為嚮  
道且有功何得不陞無拘常例遂陞為指揮仍賜  
勅嘉勞之設廣寧苑初陝西苑馬寺言開城縣境  
乃長樂監所屬故廣寧苑牧地先已給降印信以  
無馬未設苑治今其地牧馬凡四千三百七十四匹  
令百戶何通提督請開苑以原降印信與通署掌  
上命行在吏部復設苑別選官掌印理事

乙酉



監察御史鄧榮巡按直隸蘇州諸郡歲期當代蘇之屬縣里老糧長二千餘人言於巡撫侍郎成均云榮處事安祥理刑平恕除革奸弊軍民安業乞仍留巡按一年均以聞

上從之 陝西按察司僉事林時言二事其一洪武中天下邑里皆置申明旌善二亭民有善惡則書於此以示勸懲凡戶婚田土闕毆常事里老於此剖決彰善瘴惡最是良法今各處亭宇多廢民之善惡不書無以勸懲凡有爭鬪小事不由里老輒赴上司獄訟之繁皆由於此請與舉舊制度裁民

風可厚獄訟可息其二文武並用長久之術故武臣子弟不可不知書今天下軍衛亦有開設學校者而未設之處尚多臣愚以為衛所在諸府州縣者宜令武臣子孫及旗軍俊秀子弟皆令入學讀書每五日一輟書習武藝果有成效皆許出身如是則皆知忠孝之道備文武之才庶幾國家得人為用

上曰此皆舊制所司即申明之

丙戌

上念即位以來四方蕃國皆來朝貢惟日本未至遂



命內官柴山賫勅往琉球國令中山王尚巴志遣人賫往日本諭之勅曰昔我

皇祖太宗文皇帝臨御之日尔日本先王源道義能敬順

天道恭事朝廷是以朝廷眷特彌厚朕今紹承

皇祖之志廣一視同仁之德特勅諭王王其益順

天心恪尊尔先王之志遣使來朝朕之待尔一如

皇祖之待尔先王非惟一家一國受福於無窮且使海濱之民皆得以永享太平之福尔其欽哉

安定王亦攀舟遣指揮果脫不花阿端等衛指揮

同知真只罕來朝貢馬 行在戶部奏趙王高燧

已薨歲祿三萬石請停止

上曰此王國歲祿王薨有子將嗣封豈可停祿給之

如舊

丁亥

迤北韃靼買來的小泄等來歸奏願居京自效命

買來的為指揮同知小泄為副千戶給哈赤脫脫

小花等七人為百戶所鎮撫賜冠帶金織襲衣綵

幣銀鈔絹布鞍馬有差仍命有司給房屋器皿等

物如例 福建布政司右叅政彭脊有罪謫充驛



夫眷往汀州府清理軍伍受賂事覺故謫之 行  
在中軍都督府奏鳳陽中衛百戶何清有罪遇  
赦謝恩遂往山西翼城縣閒居曠職三年請治其  
罪

上曰居官食祿當夙夜勤勵而放曠若此令執而罪  
之

戊子

以河南衛輝府新鄉縣吏郭瑄為南陽府鴉路鎮  
巡檢縣因有強盜劫掠民財瑄以計擒獲送京  
上曰捕強盜須損軀命乃可得吏能如此宜旌之遂

<sup>賜</sup>欽授以巡檢使專捕盜 嘉興府知府齊政言嘉

興等縣所徵稅糧上中戶令納於行在光祿寺及  
臨清徐州淮安下戶及官田重租令納本府及海  
寧乍浦諸衛所臣觀下戶多貧官田租重屢有逋  
負致軍食不充而况海寧乍浦地皆瀕海比承法  
司移文允浙江布政司有犯絞斬應納米贖罪者  
令輸於淮安倉路遠未免多負前蘇州府罪囚應  
納米者承戶部移文令輸於本處倉乞准此例俟  
儲積有餘仍輸淮安又言律有家人共犯坐其尊  
者婦人有犯坐其夫男比者姦民欲復私讐按取



財物貨輒造虛詞誣人父母兄弟子姪婦女及與  
逮對枉直雖明而良善者已被其累乞勅法司有  
告及父母兄弟子姪妻女者惟十惡重罪則并逮  
餘候審鞫既明事有連者然後逮問如此則奸計  
不行而良善得安俱從之 夜有流星大如鷄彈  
色青白尾跡有光起勾陳北行至華蓋復有彗出  
西方十有七日始滅

己丑

賜阿倫衛女直指揮同知亦省哥等綵幣表裏等  
物有差 重建大興縣平津閘修通州羊營閘橋

時平津之水衝閘隄岸皆圯羊營者輓運所經之  
路橋壞已久行在工部以聞故有是命 命指揮  
真只罕掌阿端衛事指揮僉事卜荅兀副之真只  
罕者帖木兒谷人其故父鎖魯丹初授阿端衛指  
揮僉事嘗為曲先衛賊首散即思所脇劫掠使臣  
及朝廷調軍征勦鎖魯丹懼罪遠遁失其所受印  
朝廷知劫掠非其本心遣人撫諭之真只罕乃引  
部屬還處帖兒谷至是未朝貢馬自陳阿端舊城  
乃回回之境去帖兒谷尚一月程難於朝貢乞移  
置本土為便時鎮守西寧都督僉事史昭亦以為



為言從其徙仍給衛賜璽書撫諭之 強盜王斌等伏誅斌濟陽衛指揮僉事其妻都督譚廣表姪廣往鎮宣府斌結京民之無賴者九人詐為校尉乘夜入廣家言廣失機有旨籍沒繫其家屬閉諸外室劫貨物以去至是行在錦衣衛百戶陳俊朱喜等廉察執之悉得所劫貨物以聞斌等具伏特命凌遲於市籍其家俊喜皆陞副千戶餘旗校俱陞一級

大明宣宗章皇帝實錄

大明宣宗章皇帝實錄

宣德七年二月庚寅朔

雲南鶴慶軍民府土官千夫長高英弟山等來朝貢馬 巡按廣東監察御史陳汭奏廣東海洋廣濶海寇屢出為患往者調遣官軍五千人海船五十艘出海巡捕二十餘年多被漂沒無益警備請如福建立水寨於潮州碣石南海神電廣海雷州海南廉州八衛海道衝要之處官軍操舟就糧守備每寨用指揮一員督之仍委都督指揮一員總督以備寇且整飭腹裏諸衛官軍以備應援



上謂尚書許廓曰凡事雖有變通然亦不可不慎官軍巡海已非一日今欲立水寨未知果利便與否宜令廣東三司及巡按御史定議以聞

辛卯

上諭行在刑部都察院大理寺臣曰今天氣和煦萬物發生之時爾法司其具繫囚狀以聞朕親閱之

廣西龍州土官知州趙仁政遣族人趙福盛等

貢馬

壬辰

皇后千秋節文武群臣命婦行賀禮免山西長子

縣逃民五百三十三戶宣德二年至六年稅糧五千二百一十石草六千三百三十餘束

甲午

上親閱三法司所進繫囚罪狀諭之曰凡強盜人命白晝搶奪傷人不宥邀截實封監守自盜宥死杖一百戍遼東受枉法贓常人盜倉庫錢糧誣告人至死納米贖罪不能納者罰輸作徒遞減一年納米贖罪不能納者罰輸作徒一年者減從杖納米輸作凡納米輸作畢各復職役笞杖皆宥之若該追錢糧等物及為用銀追罰鈔米者俱減半其中



有覆勘并待對未到能自服罪及見問未完即為  
審錄皆准此例是日決遣千餘人 鄉寧郡主薨  
主代王之女嫁儀賓苑欽遣使賜祭命有司治葬  
事 賜陝西平涼衛指揮哈刺苦出所遣百戶李  
能等鈔綵幣表裏有差 北京行太僕寺奏宣德  
六年軍民孳牧馬騾駒凡五萬二千四百九十七  
匹

乙未

四川平夷長官司女土官王氏遣通事劉勝來朝  
貢馬 賜哈密衛回回舍人馬黑麻等及烏思藏

東藏刺麻鎖南藏卜等綵幣表裏等物有差

玄城衛女直舍人惱惱答來歸奏願居京自効命為

副千戶賜金織襲衣綵幣鈔布仍命有司給房屋

器物如例 貴州總兵官都督蕭授奏初安隆長

官司土官孫岑俊及頭目郎瑛聚眾攻圍慕叱寨

有勅令招撫已同廣西總兵官都督山雲各委官

撫諭今皆順服各守疆界不敢為非

上曰蠻夷當寬以撫之但得其安則已不足深究也

丙申

行在禮部侍郎章敞等使安南還權署安南國事



黎利遣使阮文絢等奉表隨啟等來朝謝恩貢金銀器皿及方物

丁酉

以明日

萬壽聖節遣衛王瞻埏謁告

長陵

獻陵 遣少傅兵部尚書華蓋殿大學士楊士琦釋

奠先師孔子 建州左衛土官都督僉事猛哥帖

木兒遣弟指揮僉事凡察等貢馬及方物 賜

陝西文縣陽湯速南等簇番僧令占伯葉中尖

尖等鈔絲幣表裏等物有差

戊戌

祭

太社

太稷 遣官祭先農

萬壽聖節

上詣 奉先殿行礼

皇太后前上壽畢出御正朝受賀賜文武群臣及四

夷朝使宴 是日雨先是天久不雨

上恐妨農耕孜孜在念以祭



社稷居齋殿存心默禱至是祀禮告成陰雲四合大雨竟日田野沾足

上以聖明感格喜而賦祭社稷承甘雨歌曰茫茫寰區天赤子

天與祖宗同付畀萬祀<sup>幾</sup>之暇予何營一念惓惓在民事春風布和二月初農家舉趾趨菑畲河水融洋土膏潤發育須承天澤敷是時國典方祈歲先社先農致禋祀端居齋後豫對越交合神明在精意東方未曙霞彩紅鵝鳩聚啼烟樹中寒威微微作料峭雲氣冉冉浮空濛甘雨從朝過日夕大地涵

濡深滿尺蔬畦壟<sup>麥</sup>望連延一夜青青總春色閭閻畎人<sup>情</sup>好好語相傳通行道今年豐稔定可期家室歡娛共相保民惟邦本著聖經民心有喜予心寧鞠躬薦裸感神惠碧天湛湛昭華呈紅燭成行照金節疊鼓清消<sup>導</sup>還闕民歡神格嘉慶多舒興一題甘雨歌

已亥  
順天府奏本府鄉試額取舉人五十人乃與江西解額同切緣京師監學天下人才所聚各處儒士亦有就試者乞如南京應天府額取舉人八十人



庶廣進賢之路從之 謫監察御史王寶戍遼東  
寶往福建監銀場擅役民斂財發人塚墓以建佛  
寺事覺行在三法司以聞

上命謫戍遼東邊衛

辛丑

命行在右軍都督僉事致仕郭志子謙襲江淮衛  
指揮使 賜安定王所遣指揮使果脫不花阿端  
等衛指揮同知真只罕等鈔綵幣表裏等物有差  
仍命果脫不花等贖勅及綵幣表裏歸賜安定王  
亦攀丹 昏刻月犯軒轅御女

壬寅

朝鮮國王李禔遣陪臣柳殷之等來朝貢方物  
賜雲南鶴慶軍民府土官舍人高山廣西龍州土  
官族人趙福盛等鈔有差 四川播州草塘安撫  
司所屬穀撒等四十一寨蠻長箇常徒等作亂聚  
衆二千餘人將攻牛場乾溪等堡事聞勅總兵官  
都督陳懷遣人撫諭如其不從發兵勦之

癸卯

襄府長史司奏本府未建社稷山川壇場請於潭  
府舊壇行事



上曰壇場雖舊苟致其潔清而將之以誠神必享之  
命禮部如其請給衍聖公孔彥縉符驗勘合俾  
朝覲往來皆得乘驛行在兵部奏直隸真定等  
七府及應天滁和等府州宣德五年孳生馬駒凡  
六萬五千八十一匹及德州左衛馬一千四百五  
匹缺軍牧養請給順天等八府民及直隸淮安等  
府新編民丁從之行在禮部奏比者太醫院舉  
荊州府江陵縣民張文玉充醫士令遣送京今本  
府言文玉九十九歲兩目昏翳其子純任南京監  
察御史文玉已受封乞免遣送

上曰此人已百歲縱有技能亦應優恤况受朝廷封  
命乎其令有司常加存問湖廣施南宣撫司忠  
路長官司奏盤順峒長向墨杓聳為仰墨施前虎  
倫等所殺下散毛納主峒土民驢拔送為田大旺  
送等所殺悉虜掠人口家財請罪之

上命都督蕭授及湖廣三司巡按監察御史体履事  
實就擒治之追所掠之物給還仍解亮徒赴京  
昏刻有流星大如盃色青白有光出游氣南行

至濁

甲辰



沙州衛都督因即來奏去歲旱災今部屬皆乏食乞垂賑濟

上語行在戶部臣曰救災恤患朕固不吝然勞內以事外亦非吾所欲遂勅因即來於肅州受糧五百石命總兵官都督劉庚等給之山西按察使張政卒政直隸廣德州人由進士擢監察御史巡按山西持身礪行政聲卓然遇事輒言不避權要陞按察使風紀益振及是卒時論惜之

乙巳

賜朝鮮國并瓦刺阿端等處貢使宴

賜四川平

夷長官司通事劉勝等鈔綵幣表裏等物有差

丙午

修南京

太廟

社稷殿宇壇垣命襄城伯李隆及工部董之

調錦衣衛帶俸指揮僉事劉全任永清左衛作大同緣邊屯堡軍士房舍從總兵官武安侯鄭亨奏也

丁未

賜行在禮部尚書胡濙宴於本部以二考奏最也



行在兵部奏遼東寧遠衛左千戶所以一百戶官軍煎鹽給軍食右千戶所以一百戶官軍炒鉄供軍器請鑄印頒給從之 交趾人陳乏初授巡檢有罪謫為民至是奏乞復職

上諭行在吏部臣曰法以加罪用法必須公宥此人何以示公勿聽

戊申

復監察御史金濂官先是浙江崇德縣賊首平康殺人劫財命濂督捕康脫走濂坐失賊免官仍命往捕濂竟獲康及其妻子至是悉械繫至京

上命誅康而復濂官

命東寧等衛千戶李欽等賫勅往建州招諭 賜朝鮮國陪臣柳殷之田時貴等綵幣表裏及金織紵絲襲衣有差 甘肅總兵官都督劉廣奏甘肅與西番北虜為隣其人時有歸附者今赤斤蒙古衛韃人祖失家加卜等三十四人以駝馬牛五百六十餘頭來歸若悉留在邊恐難防制

上諭行在兵部尚書許廓曰邊城不可聚此輩京師亦非處此輩之地况西北之人皆利於畜牧今後有來歸者令於平涼州擇便地處之亦勿致其失



所也

庚戌

復命工部右侍郎羅汝敬往陝西總督稅糧屯種  
及芻粟出納河渠等事勅諭之曰凡此衆務必須  
區畫得宜人不勞困尤在敷宣德意撫恤軍民扶  
植良善遇有訴訟重則付三司或巡按御史究治  
輕則量情責罰或付郡縣治之若有包攬侵欺盜  
賣糧草及沮撓屯種占據水利者不問外官及權  
豪勢要俱以上聞其有便民之事亦具奏來爾須  
秉公正勵廉潔勤謹詳明夙夜無懈無暴無刻度

副朕委任之重如或不謹於爾有罰欵哉  
賜建州左衛土官指揮僉事兀察等鈔幣絹布有  
差行在戶部奏陝西邊衛折收米例時陝西按  
察司僉事林時言甘州諸衛官軍俸皆於蘭縣涼  
州衛二倉收西安等府稅糧供給有司因其路遠  
止徵布絹就近糴米上倉每石有徵布七八疋至  
十疋者而納米之費實不過三四疋餘皆為總運之  
人所侵其甘州等衛俸糧於涼州關涼州等衛於  
蘭縣關往回千餘里守墩哨瞭軍餘不得往關多  
於豪家舉貸一月所得僅二三斗所以軍士愈貧



飲食不給今甘州各衛已設倉官乞將各處稅糧半徵半折布絹絲綿分運各衛米貨兼支輸送雖遠而費亦多

上命行在戶部議請從所言每十分徵本色四折色六分其布絹絲綿折米之例每疋大綿布六斗小綿布四斗大絹一石三斗小絹七斗大三梭布一石五斗小三梭布七斗其布絹務皆堅密每斤生絲一石綿一石綿花絨二斗從之 雲南總兵官太傅黔國公沐晟乞奔母喪遣勅慰諭之曰得奏孝子之痛誠難為情但朝廷委卿一方重寄未

可輒離其強節哀勉任國事蓋盡忠為孝大臣君子從古皆然卿其勉之已命禮部具儀物自初喪至祥禫皆賜祭工部遣官營葬事卿之家務亦有駙馬都尉所維持可無顧慮惟一志於公以副任託 夜有流星大如碗青白光燭地出天關旁西行至濁

辛亥

命行在刑部右侍郎樊敬往同平江伯陳瑄工部尚書李友直查理緣河漂失竹木時緣河所運竹木漂失軍民多私取之



上聞之曰此皆取自深山勞費不貲朝廷不得用而為姦人之利豈可不究於是命敬往又戒其詳慎毋事煩擾復撫寧等六衛指揮千百戶陳玉等官初玉等坐所管軍逃逸降職千百戶至有降卒伍者後有旨免降止依洪武中例罰俸故玉等皆得復其官

命故府軍前衛指揮使徐震弟昂金吾左衛指揮僉事楊勝子興王慶子福山俱襲職金吾前衛指揮同知丁亮子榮府軍前衛指揮僉事劉敬子全俱代父職以<sup>其父</sup>老又疾乞致仕也遣舍人祈成賚

勅諭安定衛指揮僉事<sup>桑</sup>哥賜之金織綵幣荅其貢馬也雲南都司奏寧遠州土官知州刀吉罕此為交賊所攻乞援三司議擬調官軍六千委都督沐昂率領赴之

上遣勅諭昂曰蠻夷譎詐未可輕信曩者尔兄南征嘗調寧遠土兵七千竟無至者而陰助黎利為逆今之所言或其自讐殺未可知何得輕動官軍為蠻夷遠役宜察其實以為進止夜有流星大如盃色赤有光起參南行至游氣

壬子



建州左衛千戶住出等來朝貢方物

癸丑

命行在兵部右侍郎柴車都察院右僉都御史凌宴如通政司右通政徐琦翰林院侍讀苗裏等清理軍職貼黃

上諭之曰軍職貼黃

祖宗時最為重務蓋武臣百死一生致軍功得蔭及子孫不清理或有冒濫則有功者屏棄無功者反受利矣爾等宜致詳慎不可怠忽置萬全都司龍門衛經歷司經歷龍門守禦千戶所吏目各一

員行在戶部奏太原府陽曲縣民地二十三頃已為廣昌府墳域請免其稅糧從之監察御史李得全等劾僧錄司右覺議大旺於慶壽寺擅創樓閣擅披剃軍民子弟隱匿亡賴人冒僧籍縱寺僧貪饕淫穢請寘諸法

上命錦衣衛執大旺等付都察院鞫之甘肅總兵

官都督劉廣奏比奉勅遣都指揮同知印鐸同西寧衛土官都指揮僉事李文等往甘州白城山招撫西番阿吉簇逃徙番民七百餘帳還居野馬川今千戶他里巴言頭目朵里只領真等六十餘帳



逃往赤斤俺官搬卜等三十餘帳逃往肅州仙人  
渠土官管屬番民請仍勅李文招撫

上曰彼皆外番何須朝廷下行其事止令廣移文諭  
之廣又奏初西番邀劫朝使命臣追理臣不敢不  
用心但番寇劫掠是其常事乞勿深究

上諭尚書許廓等曰邀劫朝使命且以為常事自古  
寇患常起於細微今廣欲養癰長疽矣尔移文詰  
之令其實對

甲寅

設保德州守禦千戶所特鎮守山西都督僉事李

謙奏保德州治逼臨黃河正當邊境要衝每至河  
凍則驅緣河居民依山入保其遠有百餘里者民  
甚苦之州舊有城墮壞已久若修築置軍屯守則  
邊備可固民居亦免遷移

上從之命行在工部以時修築仍諭行在兵部設守  
禦千戶所屬山西都司以鎮西振武鴈門三衛帶  
管山西護衛官軍八百五十餘人實之 賜圓淨  
禪師阮丹汪東銀鈔絲幣表裏等物初會寧伯李  
英徃討安定曲先阮丹汪東從之嘗有功英言於  
上遂陞<sup>為</sup>禪師令陝西行都司土官都指揮僉事李



文責賜之 曉刻月犯填星

乙卯

調陝西都指揮僉事徐諒於四川都司 復趙濬  
吳縣縣丞先是蘇州府知府况鍾奏濬闢葺無能  
起送至京吳縣民千八百餘人訴于巡撫侍郎成  
均周忱言濬守法奉公處事安祥招撫逃民率皆  
復業凡朝廷買辦物料禁革包攬不敢多科擾民  
况本縣錢糧浩大路當衝要濬善治繁劇不憚勞  
苦有愛民之心絕貪虐之弊比因本府經歷傳得  
有求于濬不從又欲取於糧長濬禁不與得憤恨

以他事譖於知府故言其無能均忱以聞命巡按  
御史覆實果如民言故命濬復職而真得於法  
鎮守洮州衛都指揮使李達奏思曩日簇番民盼  
舌撈爾節強掠本簇人畜殺千戶撈爾結臣今入  
番收馬請治其罪

上謂行在兵部臣曰番民殺部長是無上下之分不  
治則綱紀隳矣當處之有道不廢法亦不激變乃  
為得宜爾其以朕意諭之

丙辰

以明日清明節遣衛王瞻埏祭



長陵  
獻陵

丁巳

行在兵部尚書許廓言教場訓練士馬大營右哨則豐城侯李賢神機營右哨則都督馮斌二人俱遣提督蓋倉缺官總督

上曰訓練是重事倉廩亦不可緩令李賢馮斌日更番提督度兩不悞

戊午

命大興左衛指揮僉事孫旺總領五軍將軍操練

雲南寧州土官知州祿慶湖廣散毛宣撫司副使黃敬瑄遣把事覃忠等來朝貢馬 行在工部奏河東鹽池隄防兩潦頽壞請如例以旁近州縣民修築

上曰鹽利雖資國用今農事方興姑俟秋成築之又奏北京及通州增置倉廩歷久未完今漕運將至無所置頓請增軍夫八千人助役從之 巡按山西監察御史林英奏太原府石州寧鄉臨祈清源等縣平康府大寧河津永和三縣汾州介休縣民因災傷乏食已委各府縣官於本處官倉支糧計



口給濟

已未

行在兵部奏先二次清理軍伍中有事故未明勾取未到者今復造冊請再遣官清理且以新定事例二條俾通前例行之其一清理軍伍官到處令各衛所取勘先次收到清出遠年失迷等項并二千里外帶操軍士數內但有在逃者各督有司里隣人等拘捉到官依律的決差人押解原衛所着役如里隣人等仍前窩藏不拏依原定榜例問斷其二各衛所先次附近帶操軍士仍舊收操今次

清軍官到彼若有比先捏故回申軍丁自首改正與清出年遠迷失紀錄出幼軍丁俱存留附近衛所收操其餘各都司衛所見勾逃故等項軍丁不分衛所遠近照舊仍解原衛所着役軍衛有司朦朧擅收脫放者依律究問

上曰軍伍當清若課戶絕勿累平民大抵深刻之徒妄意朝廷在於得軍展轉牽連累及良善遂致訴訟紛紛不知軍民皆國之根本朕撫視如一未嘗有偏今宜諭以朕意是是非非務盡至公不得枉濫於是遣大理寺少卿榮震寺丞艾良太僕寺少



卿孫璧及御史給事中郎中員外郎等官分詣各處總兵官都督譚廣奏昨奉勅旨發萬全兵往爛柴溝等處助大同兵修築營堡今大同當調官軍三千五百人與萬全兵同赴赤城運糧臣請增撥萬全兵如大同之數而令大同應調者自於本處就近供役俱省勞費庶幾兩便從之巡按貴州監察御史陳斌奏貴州所屬治古荅意及湖廣所屬草子坪梗化生苗累肆劫掠銅仁烏羅等府及五寨及長官司民被其害不能安業總兵官都督蕭授嘗設二十四堡環其地以守之人力既

分卒難扞禦今又四出劫掠殺清浪衛守堡所鎮撫葉受勢益猖厥而都督蕭授及備禦都指揮張名恬不為意臣聞生苗之地不過三百餘里正在服化苗民之中乞別遣良將與授以湖廣貴州官軍士兵四面攻之必可殄滅

上語行在兵部尚書許廓等曰蠻人雖務劫掠若防守嚴密安能為患何至便興兵殄滅天地生物虎狼蛇蠍何所不有豈能盡滅之但當慎防而已且彼雖蠻夷亦好生惡死宜令授及貴州三司差人撫諭使改過自新如其不悛發兵勦之



大明宣宗章皇帝實錄

大明宣宗章皇帝實錄

宣德七年三月

庚申朔

勅諭行在五府六部都察院等衙門朕以菲德恭膺天命嗣承

祖宗大統夙夜惓惓思付託之重夫君國之道保民為要當春時和萬物發生顧念兵民有未得所者祇體造化之仁爰敷懷保之政庶幾下人蒙福而有以仰答

天與



祖宗之心凡爾群臣宜同朕志合行庶事勉務欽承  
一近年百姓稅糧遠運艱難官田糧重艱難尤甚  
自宣德七年為始但係官田塘地稅糧不分古額  
近額悉依宣德五年二月二十二日勅諭恩例減  
免中外該管官司不許故違一各處有軍民人等  
積年逃聚山林者本皆朝廷赤子其原蓋因所司  
不能存恤肆行貪暴故不得已為偷生之計喪其  
家業無所依歸甚可憐憫今悉宥其罪即令所在  
府州縣官用心招撫令歸復業有不願歸本鄉者  
聽於所在有司附籍為民給與荒閒田地為業免

差役三年有司厚加撫恤以副朝廷矜憫窮民之  
意官吏里老敢有違者罪之一各處逃移人戶自  
宣德六年四月以後復業者其中係工匠站灶等  
役有司毋輒勾擾自復業日為始免其差役一年  
待一年之後生計已成方令赴役一各處稅糧先  
因商賈阻滯鈔法加倍納罰今鈔法額通除正額  
外倍罰之數以十分為率減其三分塌房減五分  
南北二京不在此例伏鈔法流通再行定擬一湖  
廣廣西浙江商稅魚課辦納銀兩者自宣德七年  
為始皆折收鈔每銀一兩納鈔一百貫一軍民有



負欠宣德五年以前桑穰柴炭蘆葦者悉皆蠲免  
一在京在外軍官旗軍有為事停止俸糧者仍舊  
支給一在京在外衛所軍士有陣亡傷故失陷及  
溺水等項在營有母妻寡居無依倚者所在官司  
每月給米三斗贍之終身若原籍有丁勾取營者  
住支一在京各衛衙門軍民工匠有為事鎖鑠常  
川做工者悉宥其罪免鎖鑠如舊做工再犯治以  
重罪一自宣德五年以前軍官總小旗有為事罷  
職役發總兵官處立功者悉復職役仍於立功之  
處聽總兵官調用原任都指揮以上兵部查勘具

奏定奪真犯死罪發充軍者不在此例其宣德五  
年以前軍官旗校軍人犯罪見納米做工運輓未  
完者悉宥之令復職役一自宣德五年以前軍  
民有負欠種馬當賠償者如秋收豐熟去處令納  
米賠償每馬一匹納米十石就所在軍民官倉輸  
納非豐熟去處聽於今年秋收後納米賠償一在  
京軍馬數多供給浩繁軍民轉運艱難戶部兵部  
會官計議長策而行初在公私兩便一太醫院醫  
士有年七十以上及七十以下篤廢殘疾者送禮  
部覆勘是實放回為民有戶丁諳曉醫藥者留一



丁在京應役太常寺光祿寺厨子亦准此例一緣  
邊軍士職掌備禦近年多有投託總兵鎮守等官  
作家人及被役使種口生理等項有一官占用數  
百人者兵部即出榜禁約巡按監察御史按察司  
官時常巡察違者具實奏聞一在外文武衙門大  
小官員有貪虐無耻蠹政害法致軍民受害者巡  
按監察御史按察司官從公考察具實來聞以憑  
黜罰果廉幹循良能為軍民興利除害亦具名聞  
以憑獎勞若徇私糾舉不公者罪之一布政司按  
察司官及知府知州得其人則民安非其人則民

受害吏部往往循資陞授不免賢否混淆自今布  
政司按察司及知府知州有缺吏部行移在京三  
品以上官舉保及布政司按察司堂上官連名舉保  
取廉公端厚識達大体能為國為民者吏部察舉其  
所保果當具名奏聞量授以職後犯贓罪併罰舉  
者凡所保授官員如或有人指告其罪法司必先  
取問干証明白然後具奏提問今後各縣知縣吏  
部亦須選用得人不得一槩濫授一吏部近年每  
奏選官其間吏員冠帶率數百人雖是循用舊章  
亦當嚴加簡擇今布列郡縣道理不通者有之文



移不諳者有之貪污鄙猥比比皆是求其才用百  
無二三以望理民其何能濟自今吏員三考滿吏  
部通引於內府會同六部都察院翰林院堂上官  
出題南北類試錦衣衛堂上官監察御史六科給  
事中監試考其義理粗曉行移當得書札不謬者  
授以職事考不中者罷歸為民一襲爵侯伯悉令  
屬成國公題督操練不許懶惰庶幾朝廷得用亦  
不隳其祖父之功凡在京各衛襲職幼官年未及  
二十者毋令管事聽差亦俱屬成國公操練一各  
處有文學才行卓然出衆之士自二十五歲以上

令所在有司舉保送赴京師選用軍民之中有智  
謀材勇精於武畧者令中外文武臣僚詢察舉保  
赴京選用一唐虞之世罰不及嗣自洪熙元年五  
月以前犯罪典刑者已屢經赦宥其子弟果有才  
行文學者聽保舉選用惟犯謀反大逆典刑者其  
子弟不在選用之例一學校所以教養賢才為國  
之用學官宜嚴訓誨有司宜勤勸勵風憲官時常  
考察務臻成效一天下祀典祠壇常須潔淨或有  
損壞所司隨即修理庶幾神用安靈人永獲福一  
比來京畿屢有盜賊錦衣衛常差官校于京城內



外分派地方令晝夜巡捕如所分地方內被盜不  
即擒獲者所差官校及該管兵馬司官一體論罪  
兵馬司仍常嚴督巡警舖不許怠慢

命南京戶部左侍郎郝鵬致仕鵬山西徐溝人由戶  
部檢校陞郎中再陞湖廣叅政召還陞侍郎鵬淳  
謹有才居官能勤至是年逾七十乞致仕

上從之命給舟車還鄉 直隸淮安府奏本府舊城

東門路抵鹽城縣二百四十餘里今從南門急遞  
舖過高郵州轉至鹽城縣則四百五十餘里凡公  
差之人及公文往來迂遠遲滯請改舖舍就近為

便從之

辛酉

鎮守洮州都指揮李達及火把等獲國師班丹星  
吉等奏番民容少等一百九十一戶逃往松潘思  
曩兒班班等簇土官頭目潑隔處遣人追取不還  
人聚眾抗敵官軍遂勅松潘軍民指揮司及潑隔  
即遣容少等還庶幾保全尔父母妻子不還必發  
兵誅 副總兵都督万政奏獨石等處惟西猶兒  
峪未有城堡而當寇賊之衝已遣千戶楊洪領騎  
士屯駐且耕且守



上從之因諭兵部尚書許廓等曰屯守有方足以制敵朕以邊事委政凡所調度聽其自擇朕不中制也遼東都司言諸衛屯種耕牛初皆買於朝鮮今牛多死缺用遂遣內官昌盛等賫勅諭朝鮮國王李禔賜以紵絲紗羅錦帛令如永樂故事選牛一萬送遼東都司給軍仍遣員外郎李顯運絹五萬疋償其直

上退朝御左順門謂尚書胡濙曰朕昨以官田賦重百姓苦之詔減十之三以蘇民力嘗聞外間有言朝廷每下詔蠲除租賦而戶部皆不准甚者文移

戒約有司有勿以詔書為辭之語若果然則是廢格詔令壅遏恩澤不使下流其咎若何今減租之令務在必行一書曰民惟邦本固邦寧有子曰百姓不足君孰與足卿等皆士人豈不知此朕昨有詩述此意卿當体念勿忘也濙等皆頓首謝其詩曰官租頗繁重在昔盖有因而此服田者本皆貧下民耕作既勞勩輸納亦苦辛遂令衣食微局以贍其身殷念惻予懷以迹安得循下詔減什三行之四方均先王視萬姓有若父子親茲惟重邦本豈曰矜吾仁



壬戌

申嚴僧人化緣之禁

上謂都御史顧佐曰佛不化人為善今僧人多不守戒律不務祖風往往以創造寺院為名群舛佛像徧歷郡<sup>縣</sup>化緣所得財物皆以非礼耗費其申明洪武中禁令違者必罪之建州左衛指揮僉事兀察以招撫遠夷歸附陞為都指揮僉事且賜勅勞之順天府言霸州范家口河舊設官舟三艚以濟往來年久壞爛請改造仍置水夫四人操濟從之改作思南府儒學從巡按貴州監察御史陳

斌言也

水決固安縣馬莊等處隄岸命順天府

發民修築

癸亥

賜尚書蹇義楊士奇楊榮胡濙太常寺卿楊溥南京抽分場柴人四十萬斤勅襄城伯李隆於瓦屑埧給之賜建州左衛千戶住出等鈔絲幣表裏絹布有差行在工部尚書李友直奏通州至直沽河道迂曲尤多灘淺舟行阻滯永樂中嘗命侯伯一人總督濬治乃得通行請如故事上命行在戶部侍郎王佐往督之



甲子

四川鹽井衛土官副千戶綽甲子阿白等來朝貢  
馬 賜湖廣散毛宣撫司把事覃忠雲南寧州土  
官知州祿慶等鈔幣有差

乙丑

陝西都司奏初本司改為永興王府以西安左衛  
為治所西安左衛則徙於長樂門治事今西安中  
護衛已調公廨空閑欲俟農隙繕蓋聽事改為都  
司而以今治所仍為西安左衛從之

丙寅

四川播州宣慰使楊昇遣姪忠雲南江川縣土民  
李實等來朝貢馬 設雲南金齒軍民指揮使司  
及大理府道紀司各置都紀一員 永平府撫寧  
縣知縣姜忠言本縣舊建山川壇于縣治之東初  
建之時居民稀少比來民舍頗增混雜褻瀆國家  
定制山川壇應在郭外乞移於縣東高爽之地  
上謂尚書胡濙曰祀神當嚴潔靜謐豈可雜居民間  
命速徙之 直隸真定府深城縣老人駱得言縣  
自五年八月至六年六月不雨田穀無收民秋糧  
一千六百一石七斗草一萬九千七百七十三束



食鹽米應折黑豆六百二石乞不為例折收鈔布  
從之

丁卯

調南京刑部侍郎成均於南京戶部以九載考最  
陸行在翰林院編修裴綸為修撰中書舍人朱禮  
為尚寶司丞萬全都司斷事王豫為太僕寺丞擢  
進士王學敏監生胡正顏維莫敏吳瑜宸昭李果  
為行在監察御史學敏福建道正貴州道繼廣西  
道敏昭雲南道瑜四川道果山西道復姜弘山西  
洪洞縣丞陸正七品祿弘任滿當陸以其民奏請

留之故有是命

戊辰

陝西行都司土官都指揮僉事李文遣百戶薛帖  
失加等洮州衛土官指揮同知蘇霖等來朝貢駝  
馬

上諭兵部尚書許廓等曰昨調四川護衛軍士來南  
京人之常情豈能忘舊最要撫綏得所其寬恤一  
年俾安居定業然後使役行在兵部尚書許廓  
奏比者武昌推官姜暮訴其祖充五開衛軍已死  
其父老病戶無餘丁今五開訴取暮補援洪武中



例乞除免今覆勘是實不敢擅除

上曰太祖皇帝於生員有成尚不忍棄况暮為官豈止一卒之用其除之俾修職自效  
已已

琉球國中山王尚巴志遣使者漫泰來結制等表貢馬及方物 從南京龍江壇初工部奏壇西外垣為江水所齧命襄城伯李隆等發軍夫修築既復淪陷難於用工至是請移置於高阜之地所用軍夫工匠物料請於附近衛所州縣取給從之  
山西太原府一十三縣平陽府二州六縣汾州三

縣及沁州等處奏去年霜早秋田不收民人飢乏令行在戶部凡其糧草悉停徵 少保戶部尚書

兼武英殿大學士致事黃淮父思恭卒思恭嘗封以子官行在禮部以聞命如例祭葬

庚午

命守西寧都督僉事史昭佩征西將軍印充總兵官鎮守寧夏命守河州都督同知劉昭兼治西寧勅史昭曰爾練達老戎公勤廉正朕心所嘉茲命往鎮寧夏整飭城池操練軍馬凡事審度可否而行須晝夜盡心守備俾這境寧謐軍士得所庶副



朝廷委任宥廣東都指揮使花英贓罪初英受寧川千戶餽遺白金百三十兩事聞命巡按御史陳汭体覆至是汭奏事實法當罪之

上曰朕聞其祖父有功

先朝姑屈法宥之君武臣慢軍功必不宥也

壬申

命行在吏部都察院選五城兵馬指揮時監察御史揭稽言五城兵馬指揮司譏察奸盜禁革強暴所繫不輕今各司官多柔懦無為貪暴不律有勢之家奸弊不問無勢之人擾害不勝乞勅行在吏部

會官揀選勝任留之不稱者別用仍選廉幹剛直之人除授

上曰御史言是永樂中任兵馬者多能用心今不及矣都察院即同吏部從公擇選闕茸不才者黜退別用慎選廉公能幹之人任之行在禮部言哈烈所遣朝貢之使將至京

上曰哈烈極遠慕義而來遣錦衣衛指揮鴉忽等迎勞之貴州總兵官都督僉事蕭授奏初貴州所屬治古荅意等長官司新郎等寨殘苗吳不尔等出沒清浪衛地方劫掠守堡鎮撫葉受已令湖



廣備禦都指揮張名領共擒獲而吳不尔等遁入  
箐子坪結生苗龍不登等及糾合鎮溪稍裏順苗  
賊衆攻劫湖廣五寨長官司民寨白崖等處為患  
滋甚又令辰沅等衛添兵防禦緣箐子坪治古峽  
意與貴州湖廣四川接壤今請量調湖廣貴州官  
軍并貴州所屬附近烏羅銅仁思南三府湖廣永  
順保靖二宣慰司五寨長官司同四川所屬酉陽  
宣撫司石耶平茶二長官司重慶衛邑梅長官司  
土兵分路並進併力攻勦以除邊患

上諭兵部尚書許廓曰朕非欲用兵但苗蠻肆惡慮  
其傷人害物不已不可姑息其悉從之

癸酉

大通關提舉司吏文中自陳臣廣東瓊州府儋州  
昌化縣學生永樂二十一年鄉試中式因病未及  
會試繼丁母憂宣德六年八月至部以違限充吏  
切思海外之人本圖光顯今乃淪謫為吏伏望

聖恩矜念俾得下科會試

上命行在禮部試驗其人禮部奏試其文可取命俟  
會試出身

乙亥



賜四川鹽井衛土官舍人阿白播州宣慰司舍人  
揚忠雲南江川縣土民李實等鈔錦綺綵幣表裏  
有差

丙子

設江西吉安府永新縣新安禾山二巡檢司各置  
巡檢一員洪武中嘗設二巡檢司知府湯監以永  
新有守禦千戶所奏罷之至是本府以其地當梅  
花峒寇盜出沒故奏請復設焉 置山西都司保  
德州守禦千戶所吏目一員 賜陝西兆州衛土  
官指揮同知蘇霖等鈔綵幣表裏有差 琉球國

中山王使臣漫泰來結制奏來時所乘舟至福建  
閩淺損折乞勅有司給舟以歸  
上命行在工部給之

戊寅

陝西烏思藏番僧容奴兒堅等來朝貢馬

己卯

行在吏部尚書郭璉等奏比陝西按察司僉事林  
時言各處衛所宜建學校以教軍官子孫臣等議  
得衛所與府州縣治相隣者令入府州縣學讀書  
相遠者或一衛所或二三衛所共設一學以教訓



之學有成者聽赴本處鄉試從之 昏刻有流星  
大如鷄彈色青白尾跡有光出正東雲中東北行  
至雲中

庚申

賜安南使臣阮文絢等鈔幣遣歸

辛巳

南京國子監司業陳敬宗奏助教宋琮等授職年  
久皆無皂隸給使請如北京國子監例給之  
上曰舊不與皂隸者以其非常叅官然貴賤相承禮  
之常分遂命兵部如例與之

壬午

行在戶部言南北二京贖罰庫所收衣服布絹等  
物年久積多恐有損壞請本部委官同御史給事  
中內官逐一檢閱完好者驗時直准給兩京文武  
官月俸從之

癸未

雲南鶴慶軍民府故土官知府高寶妻楊氏同其  
子倫耒朝貢馬

命故後軍都督同知朱崇子震襲指揮使於燕山右  
衛給俸操練先是有旨凡都督應襲之子能任事



者定衛任事未能任事者令於原衛給俸操練至是行在兵部以震始出幼請所以處之上曰指揮使一衛之長不智過人乃能稱任不可以後生少年處之姑令操練俟年二十之上觀其可任然後任之

命故遼東都司指揮同知趙全子保襲為金吾左衛指揮同知旗手衛指揮同知趙諒子廣行在虎賁在衛指揮僉事陳興子慶俱襲職 陞遼府右長史湯新為左長史審理正杜述為右長史從遼王所奏也

甲申

以久不雨遣順天府尹李庸祭大小青龍之神其文曰今春已暮農務方興而雨澤未降穀種未下宿麥不滋朕為生民之主夙夜在懷特用祭告惟神明彰感通早霈甘澍以慰民望

命北京行太僕寺選馬駒五百匹送御馬監調習賜琉球國使者漫泰耒結制等綵幣表裏綿布有差 行在吏部奏南京光祿寺事簡官多當減堂上止留寺丞二員典簿祿事各一員每署留官三員餘皆別用從之 夜有流星大如鷄彈色青白



尾跡有光起危東北行王濁

乙酉

貴州全筑安撫司頭目王真等來朝貢馬 行在  
吏部尚書郭璉等言欽承

聖諭凡吏員冠帶者引於內府會官考試其文義粗  
曉行移得當書札不謬者授以職事考不中者罷  
為民臣等以為人有南北才有高下會考之時宜  
分等第文義粗曉行移得當書札不謬三事俱可  
取者為一等二事可取者為二等別行奏請量才  
授職其三事俱不可取者罷歸為民

上曰然一等如資格用二等未入流內用餘如汝等  
議 行在都察院右都御史顧佐同吏部尚書郭  
璉考覈五城兵馬司官高貴等二十人不勝任以  
聞

上命吏部別用仍慎選廉能剛直之人任之庶幾京  
師奸宄<sup>究</sup>可戢 廣西總兵官都督山雲奏斬獲廣  
西桂平等縣蠻寇覃公專等首級之數

上顧尚書許廓曰蠻夷害我良民譬之蝨賊害稼不  
可不去然殺之過多亦所不忍廓對曰兵以誅有  
罪彼皆自取滅亡非朝也有意殺之



上曰天地以生物為心今雖殺賊官軍亦豈得無損  
朕之意但欲兩全之庶幾不愧天也 宥四川都  
指揮僉事李斌斌往重慶查官木因公杖百戶數  
十十餘日死法司奏請罪之

上曰因公施刑之過非有贓罪姑宥之

丙戌

昏刻有流星大如盃色赤有光起天廟西南行至  
濁

大明宣宗章皇帝實錄

大明宣宗章皇帝實錄

宣德七年夏四月己丑朔享

太廟 遣中官祭司灶之神 應天府奏試鄉試同

考官請命兵部給脚力

上從之顧謂禮部尚書胡濙等曰考官取士但據文  
章不悖經意即可充選然應舉之人皆憑學校有  
司保送其人果孝弟忠信而又通今博古科目取  
之足為世用若德行不修而徒有文辭亦終無益  
考官須是學問老成心術正大之士不然亦能顛  
倒是非卿等宜申明朕意各使知慎 河東陝西



都轉運鹽使司奏鹽池近地舊有姚暹河水流入五星湖轉流黃河兩岸窪下近歲霖雨水漲衝流至解州界水急浪湧南岸衝決沒民地三十餘里壞鹽池護隄鹽遂不結復因涑水河地勢高泥水混流日久淤塞乞行山西布政司平陽府起民夫疏濬二河庶鹽課無虧民獲其利

上諭行在工部令於農隙時發民用工

庚寅

山東都司布政司按察司奏逃民多聚宜山等處時出劫掠為民害請發兵勦之

上謂行在兵部曰此本皆良人必有所不得已然後逃聚為非當究其情未可遽肆殺戮遂降勅諭之曰尔本皆良善祇以軍衛有司虐害之過不得已逃聚山林久皆窘於衣食因行劫以苟活今山東三司奏請調軍勦捕朕原爾初心有可憫者且慮大軍一至傷害必多用體

天心特賜赦宥爾宜改悔前非各復舊業凡前逋負官物悉皆蠲免復業之後仍免稅糧及雜泛差役三年仍舊不悛結聚作過則官軍必至不惟爾身受禍舉家俱不能保悔無及矣仍勅山東三司堂



上官親詣招諭若能改過即加撫恤如其怙終具實奏來發兵勦之

辛卯

貴州宣慰司安中等來朝貢馬一百四匹 總兵官平江伯陳瑄等言新開白塔河工畢其河南出大江北通揚州去舊所設巡檢司頗遠宜於江口添置巡檢司以禦盜賊從之 直隸保定府高陽完定興三縣真定府元氏縣各奏人民缺食乞以預備倉糧驗口賑濟

上曰預備倉糧所以為民民乏食當先發後聞必待

奏報無餒死者乎命行在戶部亟遣官馳往發賑  
壬辰

免蘇州衛抑配軍一百五十九人其已食糧止令終本身者又一千二百三十九人先是監察御史李立往蘇常諸郡清理軍伍立殘忍驚悍不能奉宣德意謂朝廷惟在得軍蘇州府同知張徽亦順承之凡戶絕者輒取同名姓或遠族干親及承繼產業之人補役里長老人稍為辯明輒加酷罰民受寃抑相與訴之於朝知府况鍾復奏其事乃命侍郎成均重為清理至是均具實以聞故有是命



山西澤州高平縣奏宣德五年以前復業民重  
春吞等稅糧已免徵而芻草未免今年逃民李廣  
等始招復業生理未遂其應納稅糧芻草皆乞除  
豁庶使貧民得所命行在戶部悉免之

乙未

皇太后聖節

上率親王上壽宗室諸王各遣人奉表賀免文武群

臣命婦賀禮

已亥

行在戶部奏國家著令郡王長子襲封郡王者歲

祿比初封郡王減半今楚府岳陽悼惠王長子季  
境襲封岳陽王又封次子季輝及永安王第三子

季璵為鎮國將軍宜各給歲祿米一千石於湖廣

附近縣米鈔兼支從之永安王孟炯薨王楚昭

王第三子薨年五十有一賜<sup>祭</sup>諡懿簡令有司治

喪葬哈密忠順王卜答失里遣使臣兀馬兒火

者等及所部指揮拜拜之子捨伯兒沙等來朝貢

馬四川總兵官都督陳懷奏播州草塘安撫司

所屬谷撤等四十一寨蠻長箇常從等皆招撫復

業



上謂行在兵部尚書許廓寺曰蠻人好生惡死彼其梗化必有所激宜令所在官司寬撫之

庚子

命侍郎周忱重清理常州府軍先是清軍監察御史李立必欲得軍所至有戶絕者拘其同姓及外親或承產業之人逼抑補役常州同知張宗璉務盡是非之<sup>實</sup>每與力爭立輒盛氣挫辱出惡言醜詆宗璉無可柰何平民包譙等受抑者七百二十餘人訴於朝

上謂兵部尚書許廓曰清軍本欲究知虛實豈意小人刻薄至此今侍郎周忱巡撫常州宜令清理務盡其實勿蹈前非

命錦衣衛指揮同知張軌閒居養親先是

上命張軌總督各衛舍人操練軌以母疾辭

上念之故有是命

辛丑

賜代王第七子名遜焯第八子遜焞第九子遜熿第十子遜燦免山西逋負稅糧二百四十五萬四千八百石馬草五百一十三萬束先是上以山西旱傷勅巡撫侍郎于謙及山西三司巡按



御史曰朕為天下主夙夜拳拳惟欲生民咸得其  
所聞山西境內連年災傷田禾薄收民多艱食深  
用憫惻尔等即分官勘實允宣德六年稅糧馬草  
及逃民累年所欠糧草盡行蠲免仍督府州縣官  
用心撫恤缺食者量加賑濟毋令失所至是謙等  
具實以聞命免徵行在都察院右都御史顧佐  
等奏繫囚有徵贖日久未完者欲行原籍徵量其  
地理遠近立限期令按察司巡按監察御史程督  
從之副總兵都督方政奏獨石雲州赤城鵬鷄  
四處并龍門衛龍門千戶所城垣俱沙土不堅屢

被雨壞請令軍下余丁陶甃包砌

上謂行在工部尚書吳中曰邊境城垣當堅固然陶  
甃非易事用人須以時宜令審度而行必使農功  
不廢包砌亦完乃可耳巡按監察御史林英自  
山西還言太原平陽等府汾代陽曲等州縣多強  
賊

上曰山西有都司布政司按察司又命李謙鎮守所  
宜察姦禁邪以圖安輯今強賊不制豈以為小盜  
不加意耶涓涓不已將成江河豈可使之滋蔓遂  
遣勅切責謙等令發兵捕之如所遣人生事擾良



善者以軍法論

壬寅

四川長河西魚通寧遠等處刺麻查及朵番僧精客引占雜谷安撫司番僧計納藏汝奉州番僧温不容但監藏崑州長官司長官讓達等貢馬及方物行在戶部奏重擬邊境中鹽糧例寧遠獨石肅州三處淮浙鹽每引米二斗五升河間長蘆鹽三斗山東河東福建四川廣東鹽俱一斗五升宣府大同山海龍門甘州寧夏六處淮浙鹽每引三斗河間長蘆鹽三斗五升山東河東福建四川廣東

鹽俱二斗從之時各處總兵官皆請召商納米實邊故也 行在兵部奏掌觀海衛事都指揮僉事趙誠初為河南中護衛餘丁以告密得錦衣衛指揮僉事陞職掌觀海衛卒其兄祥今告襲指揮僉事

上曰軍官一員半級非容易所以當傳子孫彼但以口舌得之豈艱難立功者比乎令襲副千戶 昏刻有流星大如鷄彈色赤有光起翼西南行至游

氣

癸卯



甘肅總兵官都督劉廣奏初韃韃脫脫不花等二十餘戶既降復叛今在鉄門関西請發軍掩捕

上諭兵部尚書許廓曰虜人難馴其性則然朕以寬待之來者不拒去者不追今以二十餘家輒欲興兵捕之所得幾何徒自勞費保境安人要為上策尔移文令廣慎固封守勿輕出兵 河南汝州及

魯山縣奏復業民缺食倉糧除量存官吏支用其餘請以賑濟又直隸廣平府曲周永平二縣各奏人民缺食乞給官糧賑濟

上命行在戶部皆從之未給者遣人馳驛往賑 哈

烈使臣法虎兒丁等至京言至沙州被赤斤蒙古衛都指揮革古此等劫殺行在兵部言沙州乃都督因即來所轄革古者合居赤斤蒙古之地乃越入為盜罪不可容

上曰夷狄固無知然事亦須審實遂勅因即來察之如果革古者等所為即追還之而宥其罪且命因即來曰彼即為盜不可復容宜驅而出之賜歸本土仍戒約之再犯必不宥

乙巳

監察御史章聰坐奏事不實及因疾低價買蜜準



例納米贖罪仍降四等用

丙午

建州衛女直僧人綽失班四川益井衛上官千戶  
八的抄遣把事卜祿台雲南鄧川州把事何成等  
來朝貢馬 賜烏思藏番僧容奴兒堅等綵幣來  
裏有差 迤址和寧王阿魯台部屬弩溫帖木兒  
口克邨合刺等來歸奏願居京自效俱命為所鎮  
撫賜金織襲衣綵幣銀鈔絹布鞍馬仍命有司給  
房屋器物 日入後有流星大如碗色青白有光  
出東北雲中南行至雲中

丁未

勅襄陽府長史紀善曰朕弟襄王聰明賢達比者  
左右小人不守禮法干犯憲章以玷王之令名而  
王實不知尔等職專輔導皆當言之庶幾盡尔之  
職今姑略尔前過自後但王左右敢有慢王擅作  
非法其實奏來如隱不奏事覺同罪 賜雲南鶴  
慶軍民府土官知府高寶妻楊氏子倫鈔

戊申

調赤城備禦都指揮僉事汪貴任萬全都司先是  
萬全都指揮唐銘都指揮僉事卜福更番領軍戍



守開平至是福有目疾也副總兵都督方政請以  
貴代而令福專守獨石故命之 四川長河西魚  
通寧遠等處刺麻番僧出知星吉等來朝貢馬及  
方物 賜貴州宣慰使安中等八十二人金筑安  
撫司頭目王真等鈔錦綺綵幣表裏有差 行在  
都察院言守皇城四門官軍職當閑防搜檢出入  
之人其應出入者搜檢既畢隨即放行有盜內府  
財物者則當引奏不當擅自捶撻今軍職多不  
守法不能鈴束軍士凡應出入之人徃徃誣以不  
服搜檢動加捶撻如光祿厨子有供祭祀者有進  
御膳者供進之際亦被捶撻甚至以不潔之事後  
使之者法實難容請究罪之

上曰姑榜諭之使改如又不改執而罪之勿怒

乙酉

北京國子監言今監生不啻數千多有挈家來者  
僦屋以居監之東金吾等三衛草場二所乞賜諸  
生建房舍其間地給本監種蔬菜以供會饌悉從  
之

命行在工部為構房舍給師生會饌什器復命戶部  
給生有家室者月糧皆如南京例



辛亥

遼東自在州指揮僉事贊卜安樂州副千戶阿里  
奇者等來朝貢方物 陸太原右衛總旗董成為  
副千戶時虜寇十七人入朔州掠潞州運糧民牛  
寇迫暮宿荒溝中成時在朔州屯夜率其子及民  
人謝猪狗等十九人往劫之殺寇七人成父子斬  
首二級盡得其所掠牛以歸事聞

上命陸成為副千戶猪狗等俱為總旗賜鈔帛有差  
遂以成事勅守邊諸將曰虜所以得入境為寇者  
乘間隙也若守邊者皆能謹瞭望嚴守備寇安能

至尔等但勉之爵非朕所吝 賜哈密忠順王使

臣兀馬兒火者捨伯兒沙等鈔幣表裏絹布及紵

絲襲衣有差 南京都察院右僉都御史奏行在

都察院令捕原問橫海衛鎮撫李顥顥以盜糧當  
死已送行在都察院審決罰役而逃非臣等應捕  
右都御史顧佐監察御史程富奏訥推托請逮問  
之

上諭佐曰訥已送顥等至此尔等遣罰役而後逃何  
為仍責訥捕民逃問州縣軍逃問衛所何以問法  
司且尔非法司乎尔大臣姑不問其罰程富俸三



月行在都察院奏蘇州府知府况鍾輕聽經歷傳得譴言奏黜吳江縣丞趙濬今濬事白已復職得亦寘之法請正鍾妄奏之罪

上曰此等欺鍾鍾失之不察耳姑記其過仍移文示鍾俾知戒慎山西屯留縣疾風震電雨雹殺麥壬子

行在都察院奏所擬巡撫侍郎與巡按監察御史按察司文移事例先是勅侍郎分巡各處撫恤人民遇有訴訟重者付布政司按察司或巡按監察御史鞫問時吏部右侍郎趙新往江西江西按察

司謂非六部統屬承行詞訟多不回報新咨行在禮部取明降禮部奏欲行都察院令按察司遵勅行之

上曰朕遣侍郎四出巡撫令以詞訟之大者付二司與御史不惟欲重其任其大体亦當如是然諸司文移各有統其與都御史顧佐議擬以聞於是佐上言

聖朝內設監察御史外設按察司凡諸司官不公不法皆得糾舉故與諸司無承行所以重耳目之寄崇紀綱之司也今侍郎趙新欲令按察司以問完



詞訟回報蓋刑名重事乃刑部都察院所掌縱使  
按察司回報不惟其難擅決斷抑恐其專肆妄為  
又慮御史按察司被其挾制曲法阿從以致顛倒  
是非出入人罪此尤不可請令各處巡按御史及  
按察司自今遇有巡撫侍郎送到詞訟其間果係  
切要重事則遵勅理問奏解赴京決遣如有干碍  
軍職及五品以上文官及當奏之事則奏請裁決  
乃照例呈都察院乞勅禮部移文令新等自今凡  
有事務止行移布政司及府州縣轉行巡按御史  
按察司行之若非切要重事不得一槩徑行

上是其言 直隸保定府安肅縣奏去年六月霪雨  
不止滄沒田禾人民乏食乞以官倉所貯宣德二  
年至五年夏稅秋糧米麥豆共一千四百五十餘  
石驗口賑濟從之

癸丑

寧化王濟煥奏子女婚禮已成請入朝謝恩遣書  
止之 瓦剌順寧王脫歡使臣福家奴等來朝貢  
馬

甲寅

命故燕山右衛指揮使沈貴弟全燕山前衛指揮



使劉全子通府軍前衛指揮同知聶貴弟祥錦衣  
衛指揮僉事畢盛子宗大興左衛指揮僉事古銘  
子原俱襲職羽林前衛老疾指揮僉事鄭信子忠  
代職 行在吏部尚書郭璉歷官一考賜宴于行  
在禮部 行在刑科給事中李原縉言各處遞運  
所遞送犯人無問輕重並加桎梏逼索財物奪其  
衣食多有凍餓死者乞命行在都察院出榜禁約  
仍移文中外諸司自今凡發回原告及起解罪人  
等必須勘酌果情犯深重發遞運所防解輕者或  
本衙門差人押送或衛所州縣遞送又輕者給引

照行不許槩發遞運所庶不累死無辜從之 浙  
江温州府知府何文淵奏瑞安縣耆民言洪武永  
樂間琉球入貢舟泊寧波故寧波有市舶提舉司  
安遠驛以貯方物館穀使者比來番使泊船瑞安  
苟圖便利因無館驛舍於民家所貢方物無收貯  
之所及運赴京道經馮公等嶺嶮崎艱險乞自今  
番舩來者令仍泊寧波為便行在禮部言永樂間  
琉球舩至或泊福建或寧波或瑞安今其國貢使  
之舟凡三二泊福建泊瑞安詢之蓋因風勢使然  
非其有意也所言瑞安無一館驛宜令工部移文



浙江布政司於瑞安置公館及庫以貯貢物  
上曰此非急務宜俟農隙為之 貴州前衛鎮撫龔  
海奏都指揮僉事蘇保僭用玉帶私造兵器以私  
事役軍致溺河死無數榜死架閣庫吏總兵官都  
督蕭授委保率軍赴廣西聽征保妄奏普定蠻民  
作耗意望存留

上以其章示右都御史顧佐等佐請令巡按監察御  
史及按察司体實具奏

上從之

乙卯

昏刻有流星大如鷄彈色青白尾跡有光出內屏  
西行至濁

丙辰

擢進士徐政為中書舍人王裕常廣江王琳劉準  
為監察御史裕行在廣西道廣行在福建道王琳  
南京福建道準南京廣西道陞直隸河間府同知  
姜濤為本府知府濤以九載任滿赴京河間等七  
縣之民詣闕奏濤施政公平撫綏有方吏民信服  
乞復任上曰畿內之官得民心如此可嘉從之而  
陞其職行在戶科給事中吳繪廣西道監察御史



李敬親喪起復命繪復職調敬湖廣點行在監察御史田富為保寧府閬中縣知縣坐不諳文移降山東布政司右叅議沈定為寧國府同知定嘗犯贓罪雖會赦猶降之設行在錦衣衛馴象千戶所倉萬全都司龍門衛倉龍門守禦千戶所倉各置倉副使一員直隸揚州府江都縣潘家庄大橋江口新開閘各置閘官一員賜四川河長西魚通寧遠等處刺麻查朶番僧精客引占雜谷安撫司番僧計納藏汝奉州番僧溫不容但監藏及崑州長官司長官讓達等鈔綵幣表裏絹帛有差

丁巳

勅總兵官武安侯鄭亨免寧化王府調戍大同軍士之半從王所奏也



大明宣宗章皇帝實錄

宣德七年五月

戊午朔

以慶王橚請入朝遣書止之曰予之願見此心實同但念叔祖春秋高道途跋涉不易所以屢承諭而不敢從也又自即位以來諸叔祖及伯叔多欲來者皆已謝却今獨從叔祖之言衆將謂何雖違命有慙而感德無既矣

命中都督同知任禮署行在右軍都督府

己未



陞羽林前衛指揮僉事岳興為府軍前衛指揮同知命錦衣衛指揮僉事徐英子麟代職 貴州思南府知府張謹奏本府稅課司歲辦課鈔一萬二千六百餘貫邊夷之地別無出產商旅少至課鈔皆民陪納近戶部以鈔法不通於課額外再加五倍夷民貧困雖鬻子女不能辦追責急則逃竄山崗乞仍舊為便

上諭行在戶部臣曰貴州邊郡其可以中國例之乎此蓋卿等初議之失其悉如舊 浙江挑渚千戶所百戶楊顯宗奏所治瀕海與台州臨海縣境相

接官軍月糧舊以臨海稅糧給之洪熙元年其圩岸為海潮衝決田禾滄沒秋糧無輸軍用艱食連年修築未完又為風潮所壞乞勅有司及時修理從之

庚申

賜瓦剌等處朝使宴

壬戌

端午節賜文武群臣扇及宴

癸亥

勅遼東總兵官都督巫凱廣寧開原馬市所買牝



馬可送遼東苑馬寺孳牧牛以給寧遠諸衛所屯  
種其餘馬駝皆送京師 泰寧衛韃官都督僉事  
脫火赤等遣指揮僉事哈刺罕四川邛部長官阿  
喬遣把事李阿得等來朝貢馬 賜自在州女直  
指揮僉事僭卜安樂州副千戶阿里奇四川益井  
衛把事卜祿台雲南鄧川州把事何成長河西魚  
通寧遠等處番僧出知星吉建州衛女直僧綽失  
班等鈔絲幣表裏絹布有差

甲子

朵顏衛指揮使司差指揮都兒帖木兒奏永樂二

年所降印信為胡虜本雅失里掠去請再給賜從  
之 夜有流星大如盃色青白有光起自氏南行  
至雲中

丙寅

以松花紅造船軍士多未還勅海西地面都指揮  
塔失納答野人指揮頭目葛郎奇納奇曰比遣中  
官亦失哈等往使奴兒干等處令都指揮劉清領  
軍松花紅造船運糧今各官還朝而軍士未還者  
五百餘人朕以爾等歸心朝廷野人女直亦遵法  
度未必誘引藏匿勅至即為尋究遣人送遼東總



兵官處庶見尔等歸向之誠 遼東總兵官都督  
巫凱奏有軍卒二人逃往海西二十餘年誘引女  
直野人入寇今皆就獲請斬以徇

上從之因勅凱等曰人情豈樂從異類此必有不得  
已者如為將能撫恤之動息以時溫飽得所雖驅  
之不去尔等勉之

戊辰

哈烈使臣法虎兒丁卒行在禮部以聞命遣官賜  
祭工部營葬

辛未

占城國王占巴的賴遣使臣逋沙帕麻託等廣東  
感恩縣故土官知縣樓吉福孫鑑等貢方物 以  
常州沒官房屋莊田賜行在禮部尚書胡濙從濙  
奏請也 復開平涼府開城縣迭烈孫道路先是

陝西叅政楊善言西安諸府州歲運糧餉走甘州  
涼州山丹永昌諸衛皆經平涼府隆德縣六盤山  
鬻蜚嶺山澗陡絕人力艱難開城縣舊有路經迭  
烈孫黃河平坦徑直抵甘州諸衛近五百餘里洪  
武中官置渡舡平涼撥軍操濟人以為便其後罷  
之今請如舊開通以利民



上命陝西三司覆實至是皆以為宜仍命

布政司給官錢造八舟平涼鞏昌二府擇善水者  
操之每舟十一人俱隸迭烈孫巡檢司 山東按  
察司僉事李賜奏廣寧前屯衛及新設寧遠衛軍  
士缺食無牛耕種乞運糧賑濟且乞哨守外免其  
餘差役優恤之又乞勅遼東都司於附近衛所官  
軍之家畜牛多者暫令借耕俟官牛至日還之時  
已命行在戶部於永平府運糧一萬石給寧遠廣  
寧二衛餘皆從所奏 順天府通州奏民間市肆  
舊取勘店房每一間月納鈔五百貫近有詔塌坊

納鈔減五分南北二京不在此例通州亦在外州  
縣乞依減納事例從之

上聞少詹事兼侍讀學士王英母卒問尚書胡濙曰  
英母亦得賜祭及營葬否對曰舊制官三官四品  
父母喪曾受封贈者官為營葬今英官四品其母  
曾受五品封

上曰儒臣吾所優禮者况非此母無此子其遣官賜  
祭仍命有司治葬勿為例

壬申

命忻州食鹽米皆折鈔初本州戶口食鹽米鈔兼



徵累年負欠計米二萬八千餘石州地皆斥鹵兼  
近歲荐旱知州吳興以為言故命折鈔

甲戌

行在禮部尚書胡濙以山西進龍馬駒請借群臣  
上表賀

上曰二三年間水旱告災繼踵而來朕方日久惕勵  
一獸之異何救民飢而欲表賀其止之

乙亥

昨城王妃鄧氏薨遣官賜祭命有司治塋事

丙子

監察御史盧睿等劾奏恭順侯吳克忠縱家人及  
所部韃官卜谷失里等馳騎挾兵劫掠官馬殺傷  
牽馬人於國門之外請逮克忠等明正其罪

上曰彼或不知先執劫馬者鞠之果于克忠其實以  
聞交趾土官百官陳復宗等言曰竊聞為臣之  
道惟忠與義臣雖生處僻方心實拳拳於此故雖  
黎利唱亂臣等明於順逆之理必守君臣之義寧  
棄墳墓遺親戚隨諸將歸朝廷蒙嘉其心給之公  
祿獎忠勸義無以加矣臣亦夙夜兢惕慙無報效  
今有司欲援寬恤事例混臣等於交趾官員之列



槩送河南山東俾之就閒然臣之所以捨家鄉而  
歸朝廷者惟忠義是徇也今乃進則遠於朝廷退  
則失其家鄉為忠與義反不得安是豈臣等本心  
哉伏望止留在京以勸天下臣子之忠義

上曰此吏部之過也特命留之凡同復宗內附者悉  
留京師行在府軍左衛指揮使張輅卒命工部  
營莖輅皇舅彭城伯晁次子為其弟旭之後故優  
待之

丁丑

上諭兵部侍郎王驥曰西北邊防最切要必須處置

得宜昨觀所進軍數如延安慶陽諸衛近寧夏却  
往戍甘州臨洮鞏昌蘭州諸衛近甘州却戍寧夏  
舍近趨遠勞費實多又肅州鎮番西寧秦州皆臨  
極邊當日為守亦分戍他處乃別調官軍戍其地  
此於人情皆非便尔同成國公朱勇等計議務在  
處置得宜勇等議以延安慶陽平涼鞏昌四衛及  
西安前後左三衛官軍戍寧夏漢中鳳翔金州三  
衛去寧夏遠皆應遣還而於寧夏中護衛撥補總  
總計一萬一千七百餘人以寧羗蘭州臨洮鞏昌  
山丹永昌涼州莊浪及甘州左右中前後五衛官



軍戍甘州通計九千八百七十餘人肅州鎮番西  
寧秦州衛禮店千戶所去甘州遠者皆遣還後之  
復給工匠月糧一石時有工匠自陳常年供役  
琉璃等廠舊支月糧一石工部比減五斗家口衆  
不能養贍

上命凡工匠常役者月糧皆如舊給之 賜瓦刺使  
臣福家奴等九十七人秦寧衛指揮僉事哈刺罕  
四川邛部長官司把事李阿得等鈔綵幣表裏紵  
綵絹布襲衣有差

上朝退御便殿觀宋史顧問侍臣曰宋有國三百餘  
年武事終於不振何也侍臣對曰宋太祖太宗初  
皆以兵平海內但其子孫率流於弱致武備不飭  
耳當時未必無將才若上人留意斯事必有其人  
出焉

上曰宋之君誠失之弱將帥雖有才亦不得展必為  
小人所壞大抵宋之亡柄用小人之過也

戊寅

賜故遂安伯陳英庶長子塤半祿英卒無嫡子塤  
甫六歲日用頗艱尚書蹇義以聞故有是命

庚辰



命南京通政司左叅議李文郁致仕文郁湖廣襄陽人由教官擢通政司叅議永樂初陞戶部侍郎未幾坐事謫戍遼東

仁宗皇帝即位召至復為叅議文郁性忠直謹持守久處患難不移其志至是以年老自陳遂命致事

北京行太僕寺以壯駒六百餘匹送御馬監

上閱之謂侍臣曰此駒皆超騰但性未馴胡人善調馬凡所至韃官人與一疋俾之調習行在都察

院奏貴州布政司左叅政鄭景曜治巡檢曹敬罪敬訴景曜嘗以私事屬已不從故誣之請逮景曜

質對從之

辛巳

亦力把里歪思王母遣使臣也力迷失士禿哈密忠順王卜答失里遣使臣倒刺火者等貢馬及玉石硃砂等方物行在刑部奏右軍都督僉事致事郭志築室以居娼妓又令家人事之失大臣休請治志罪

上曰武人不諳禮法且老矣其宥之昏刻辰星犯積屍氣

壬午



下會寧伯李英等錦衣衛獄時西寧衛指揮同知  
祁震卒其嫡子成當襲職庶子監藏英之甥也與  
成爭襲震叔太平以成詣京師辯明英右監藏怒  
太平右成遣千戶海林及家人撒禮等出京城外  
數十里捕執太平及其義兒等至家用大杖毆擊  
盡奪其所賫貲致其義兒死御史給事中交章劾  
英逞克作威殺無罪人併奏英前在西寧招納叛  
亡侵奪官民田地凡其家人皆號總管名色有不  
臣之心春秋之法人臣無將今英罪惡已著宜下  
法司明正國典

上命行在錦衣衛執英及林等下獄鞠治

癸未

四川長河西魚通寧遠等處禪師桑者朶兒只福  
餘衛韃官指揮僉事阿失朶木兒等來朝貢馬阿  
失朶木兒初歸附也 四川眉州民言崇慶州新  
津縣有通濟堰水自彭山而出分為十六渠溉田  
二萬五千餘畝民獲其利今水衝激岸堤頽壞水  
不得用田地多荒民率逃徙乞令有司如洪武永樂  
故事以時發民修築從之 遼東定遼左衛逃軍  
馬義以誣告親王伏誅義河南中護衛軍初從庶



人有熹偽造圖書及誹謗帖繫箭射彰德城下事  
覺法司論義罪當死

上宥其死癸戌定遼義逃回河南不悛前非周王有  
燬聞之欲捕義解京義恣之遂詣京師誣告周王  
交通謀議等事

上命監察御史沈敬往察之敬及三司奏義所告皆  
妄

上命法司會群臣覆訊得義實遂斬於市

甲申

命故金吾右衛帶俸都指揮僉事白貴子寬襲本衛

指揮使虎賁左衛指揮同知楊茂子全燕山右衛  
指揮僉事王賓弟用金吾右衛指揮僉事李義子  
勝金吾左衛指揮僉事王順子欽俱襲職 蘆  
山天池寺僧智順奏天池寺周顛仙赤脚僧靈跡  
猶在太祖高皇帝建寺及有御製碑文歲久碑亭  
屋宇皆壞今僧止二人乞舊如修葺且度僧以居之  
上謂行在禮部曰既有

聖祖御製詩文石刻不可無庇令有司發民於農隙  
時修理度僧亦從所言

乙酉



賜占城國使臣逋沙怕麻託等錦鈔綺羅絹布及織金襲衣有差

丙戌

賜廣東感恩縣土官舍人樓鑑等鈔紵絲表裏成國公朱勇奏永樂間運糧口外止供開平官軍及備大軍之支用近來不依舊例撙節一槩放支以致連年饋運不息若遼東衛所亦係極邊且耕且守其供不出於民費今諸邊衛皆請倣此遂上便宜八事其一萬全都司所轄地方洗馬嶺長安嶺黑峪口等處烟墩隘口并宣府神機營官軍月

糧宜令於本處附近支不許擅離信地其二開平哨備官軍糧料就於獨石倉支為便萬全左等衛宜令於宣府倉帶支前去其并平衛旗軍家小見在雲州赤城鵬鶚屯任月糧宜令於長安嶺懷來倉支其三蔚州保安隆慶永寧等州縣俱于長安嶺相近其所徵豆料秋糧今後歲輸獨石倉為便其四萬全都司所屬懷來永寧隆慶左右等衛旗軍家小月糧永樂間於在京及昌平等處閔請依舊例今年自九月收成之後至十二月宣府等衛所軍士月糧乞以其半折潤布不為常例其五宣



府未調左右二衛官軍之時調蔚州美峪等衛所  
官軍操備今宣府既有左右二衛在城原有宣府  
前衛并興和所官軍守備其蔚州等衛所調者合  
令回衛馬隊俟開平輪哨步隊俟來春屯田除食  
用之人每人歲納細米六石蔚州保安二衛美峪  
廣昌二所俱令送宣府倉收其餘衛分就本處倉  
收宣府等前衛守城等項旗軍亦宜照例摘發撥  
屯田如有緊急悉聽調用其六隆慶州乃是腹裏  
已有永寧等四衛并神機營在外保障今調懷來  
官軍二百餘名備禦且無盔甲器械閒逸費糧令

回衛屯種為便其七懷來等衛所調官軍挈家於  
順聖川草場養馬離衛三百餘里關糧往復艱難  
宜令本衛委官徑赴蔚州等衛倉就近支給其入  
宣府前衛及廣昌等衛所官軍千戶蔣鎮等一百  
六十餘人永樂間調去遼東備禦經久不代資費  
甚難宜令回原衛

上令行在戶部會官議皆以為宜惟宣府調赴遼東  
官軍不動餘悉從之令郎中王良都督毛翔專理  
屯種務臻成效大同總兵官武安侯鄭亨奏山  
陰馬邑二縣雖在大同之南實寇虜必至之地舊



城久廢每有邊警官民輒携家屬棄走請修築二城各置戶所屯守為便上從之命待農隙興工亨又言聚奎高山口外要衝之地請築土城設二衛不聽

丁亥

靖江王佐敬奏本府諸將軍之子娶南丹等衛旗軍之女請除軍籍俾得隨住

上曰既連婚宗室豈當仍居卒伍令悉除之

大明宣宗章皇帝實錄

大明宣宗章皇帝實錄

宣德七年六月戊子朔

呂城國使臣逋沙怕麻託等陞辭

上嘉其王勤修職貢命賫勅獎諭且賜王錦綺紗羅等物既辭副使逋沙怕彼賴病卒遣官賜祭命有司備歛葬 宥山東按察使虞信副使童貞僉事劉潔楊閔宋徵罪以巡按御史劾其案牘不清也直隸蘇州府知府况鍾言近奉詔書官民田地有荒蕪者召人佃種官田準民田起科無人種者勘實除豁租額臣勘得崑山等縣民以死徙從軍



除藉者三萬三千四百七十二戶所遣官田召人  
種應準民田科者二千九百八十二頃其間應減  
秋糧一十四萬九千五百一十石已嘗申達戶部  
未奉處分况官田有沒入海者糧額尚在乞皆如  
詔書除豁又言本府所屬長洲等七縣舊有民三  
十六萬餘戶秋糧二百七十七萬九千餘石其中  
民糧止一十五萬三千一百七十餘石官糧二百  
六十二萬五千九百三十餘石官田每畝科稅糧  
不等自五斗至三石洪武間徵各縣民有民糧者  
出馬二百餘匹役於濠梁等驛又出丁船役於水

驛及遞運所永樂間北方民饑徵本府民有民糧  
者出馬二百二十餘匹役於銅城等驛約至三年  
仍令土民代還比因有民糧者不足又以有官糧  
者補之至今三十餘年未曾更代民實困苦又言  
工部近徵濶三梭布八百疋浙江布政司凡十有  
一府民糧二百六十餘萬所出不過百疋蘇州一  
府獨七百疋其餘徵科不均往往類此乞維今凡  
有科徵或以民糧或以戶口為度庶幾多寡適均  
公務易集人民可甦又言各都司布政司及直隸  
衛府州縣倉歲收稅糧出給通關付納戶贖繳戶



部查理至為詳謹而有亡賴之徒私賄倉官斗級包收攬納虛出通關甚至偽造印信事覺犯者雖寘刑辟而稅糧已為侵欺不免重徵實為民患乞維今各處倉廩收糧亦如各部行移勘合編寫字號底簿一樣三本一存於部一付各處府州一同編過勘合通關紙發該倉掌印官相沿收掌凡所納糧不拘多寡截日填給通關不許洗改或差錯則明白圈註用印鈐蓋以給納戶收領回縣繳送府州比對硃墨字號相同然後轉繳該部如此則稅糧易清姦弊頓革悉從之直隸保定府易州

秦州民舊牧官羊五千二百餘羸歲賦毛如羊之數比年羊死已四千存者止千二百而官猶如舊徵毛今州民逃故者多且連年不登民皆乏食伏乞停徵俾得安存命悉免之

己丑

貴州總兵官都督蕭授獲辰州河蓬彪金等寨蠻寇向擺婆等八十五人解京師先是擺婆與向鋸腦等殺人劫財事聞

上命授遣人撫諭擺婆等負固不服為惡滋甚乃命授出兵入其地賊據險拒敵官軍敗之多所斬馘



鋸腦道遂擒婆等授撫安其餘黨而械擺婆等至京師

上命下錦衣衛獄初河蓬彪金等寨無所統屬故縱恣犯法至是命屬永順宣慰司俾善撫馭直隸河間府吳橋縣民缺食者七百七十四戶已發預備倉粟一千四百二十二石六斗賑之

庚寅

行在戶部掌部事太子太師郭資行在工部尚書吳中俱考滿賜宴於行在禮部勅副總兵都督方政比者保安衛指揮高榮奏萬全都指揮使唐

銘挾私行罰朕令銘自陳蓋銘率諸衛軍戍開平皆失期追至六十次方至以此咎指揮以下榮乃逃歸妄奏昔穰苴以莊賈失期而斬之豈但咎為銘無罪其執榮治之昏刻有流星大如鷄彈色赤尾跡有光出羽林軍東南行至濁

辛卯

南京工部尚書甄庸致仕庸宛平縣人由戶部主事陞知府坐累罷復起為監察御史陞工部侍郎再陞尚書居官和平無所可否至是考滿來朝上憫其老特勅致仕



壬辰

上以行在戶部掌部事太子太師郭資考滿既賜宴復勅勞資曰卿事 祖宗歷年最久艱難險阻備效勞動端重廉公厥績茂著肆朕纂承大統眷求老成特起卿於休致仍付地官之任三年於今矣卿正固之心誠實之行譬諸歲寒松柏愈老愈勁朕圖治方隆任賢彌篤卿尚專精神強志意益懋毗<sup>輔</sup>輸以副眷任之心欽哉 日入後有青霞二道東西竟天夜有流星大如鷄彈色赤尾跡有光出河鼓東南行入須女

甲午

廣西布政司奏靖江王府及諸將軍歲祿多不受米而遣人下有司計直索錢往往三倍取直得錢輒以市私鹽轉鬻求利民甚苦之

上勅靖江王佐敬曰制祿以米從古之道蓋因民之所有也錢則民間所無今不受所有而索其所無又三倍取之加暴擾焉民歲歲當輸而虐取不已何以自存販鬻者小人事而販私鹽違法甚矣豈所望于宗室哉既往姑不問王宜自懲更諭諸將軍各戢下毋二過庶享祿於無窮繼今有犯從廣



西布政司按察司及巡按御史捕治不可不慎  
琉球國王中山王尚巴志遣使臣南者結制等來  
朝貢馬

上諭三法司官曰今天氣炎熱見繫罪囚宜速決遣  
輕罪有例者皆如例情重者其實來聞後命法司  
凡強盜病死獄中但驗實勿斬首先是強盜死罪  
例悉斬首至是

上憫之以強盜罪惡當斬戮死人則太過故罷之

乙未

夜有流星大如鷄彈色赤有光出天市西垣西南

行至近濁

丙申

陸行在通政司右通政徐琦為南京兵部右侍郎  
巡按湖廣監察御史朱鑑言洪武年間各府州縣  
皆置東西南北四倉以貯官穀多者萬餘石少者  
四五千石倉設老人監之富民守之遇有旱水飢  
饉以貸民民受其惠今各處有司以為不急之務  
倉廩廢弛穀散不收甚至掩為已有深負朝廷仁  
民之意乞令府州縣修合廩謹儲積給貸以時徵  
收有實仍令布政司按察司巡按監察御史巡察



違者罪之不恕

上諭行在戶部曰此祖宗良法美意此由守令不得人遂致廢弛言者比比而未有興復之者爾戶部亦豈能無過其如御史言違者從按察司監察御史劾奏

丁酉

日生左右珥色青赤鮮明

巳亥

命駙馬都尉趙輝修治鳳陽

皇陵及皇城内殿宇時鳳陽奏

皇陵正殿皇城内外屋宇多有損壞宜修理

上曰此不可緩勅南京工部備材發軍民工匠興役命輝往督之勅輝曰必敬慎小心務堅固不可苟且又曰正殿宜併力修整皇城内外屋宇少待農隙可也益洗馬嶺守備兵初總兵官都督譚廣言洗馬嶺臨極邊嘗議築城為保安前衛以農時停役仍於宣府分兵為備兵常不足請秋成後築城立衛以固邊防時議者皆以廣所守地自青邊口西抵天城總四十餘烟墩守望相屬自足為固其間路通塞外如洗馬嶺者尚多豈得一城



之且築城置衛必重勞費守衛軍士亦難猝得若益軍士以屬都指揮黃去其嚴切哨瞭遇有警急令都指揮未謙以精兵為援則雖無城衛而守亦固遂從所議以兵益真行在兵部奏有令自居庸至山海諸關口凡三月以點視唯居庸關外自荆子村黑峪口至長安嶺北抵獨石接龍門關西抵天城諸烟墩隘口雖有守備未曾點閱請一體遣官巡視如設置未備軍士有缺器械不精督令修補務須完固若軍官恣為蠹弊即具實奏聞付法司治之庶知儆戒

上從之命新建伯李王擇武職一員錦衣衛官一員同御史二員點視行在都察院奏僧錄寺右覺義大旺等違法禁令縱其徒四出募民財造樓閣及擅披剃軍民子弟朦朧請度牒又隱匿亡賴人冒僧籍等罪應斬

上命固禁之行在兵部尚書許廓卒廓字文超河南襄城人由國子生授錦衣衛經歷擢工科給事中歲餘陞鴻臚寺左寺丞一年陞工部右侍郎洪熙元年陞左侍郎宣德六年陞兵部尚書廓通敏勤事其在工部嘗扈從北征董讓運軍食賴焉交



此入職方朝廷用御史言遣廓往復實戶口田賦以尚書黃福奏召還後命招復河南流民歸者九數萬戶兵部尚書張本卒陞廓代之賜勅獎勵本嚴厲詳密廓承其後濟之以寬卒年五十六遣官賜祭有司治葬事

庚子

遣中官祭中霤之神

賜占城琉球及亦力把里等處貢使宴行在鴻

臚寺少卿王勉卒勉陝西蒲城縣人建文中由國子生授太常寺試典簿

太宗皇帝即位陞寺丞尋陞少卿

仁宗皇帝嗣位陞太常寺卿與呂震同為誣罔進用齊郎事覺罷為民復起為鴻臚少卿勉坦率任意不自顧藉其卒也家雖甚窶而清議不與焉

辛丑

琉球國中山王尚巴志遣使臣步馬結制及雲南鎮南州故把事子李雍等來朝貢馬及方物

壬寅

勅甘肅總兵官都督劉廣等凡外番入貢之人及寄住回回須防閑周密勿縱於他處往來



癸卯

黜監察御史陳綱綱私欲民修祠神微服入祠驅  
逐焚香婦女嬉遊于外久不供職右僉都御史吳  
訥劾奏之命罰役降用 行在三法司奏重囚罪  
狀

上親閱之曰凡真犯死罪如律雜犯死罪皆宥死發  
戍邊凡決遣一百七十餘人

甲辰

上以東安門外綠河居民逼近黃墻喧囂之聲徹于  
大內

命行在工部改築黃墻于河東皇城之西有隙地甚  
廣豫徙綠河之人居之命錦衣衛指揮監察御史  
給事中各一員度其舊居地廣狹如舊數與地作  
居凡官吏軍民工匠俱給假二十日使治居  
乙巳

勅諭行在六部都察院曰朕為天下主惟欲天下  
之人皆安生樂業故選賢任能命之綏撫又數頒  
璽書覃布寬恤蓋惓惓以求民安曩為所任不得  
其人百姓艱難畧不矜念生事徵斂虐害百端致  
其逃徙棄離鄉土栖栖無依朕甚憫之已專遣人



招撫復業優免差役一年今聞諸司官吏仍有不  
体朕恤民之心恣意擅而復業之民歸未久居無  
廬舍畊無穀種逼其補給逋租賠償倒死孳牲馬  
牛驟羊科派諸色顏料刑驅威迫荼毒不勝此皆  
任之不得其人也其速行諸司厚加撫恤復業之  
民不許一毫攪擾仍依前勅優免差役所逋租稅  
孳生等項悉與蠲免巡按御史按察司官廉察各  
府州縣官吏里老剝削貪酷及官員軍民之家取  
索舊債震害復業之民者治以重罪如廉察不嚴  
坐視民患者罪同其各勉之以副朕懷 賜琉球

國使臣南者結制等亦力把里使臣也力迷失土  
迷禿及哈密使臣倒刺火者等四川長河西魚通  
寧遠等處禪師桑者朶兒只等福餘衛指揮魚事  
阿失答木兒等銀鈔紵絲紗羅絹布及金織龍衣  
有差 行在工部言築東安門外黃墻計用六萬  
五千人民夫不足請以成國公朱勇所部士卒三  
萬五千人助役

上曰炎暑如此豈宜興役待秋涼為之 行在廣西  
道監察御史孫純行在刑部廣東清吏司主事王  
鎮以監決重囚誤斬首為凌遲法司論純等罪應



斬

上宥之命罰役以贖既而論侍臣曰凌遲本律之文命斬首蓋出於朕一時之不忍然凌遲非過也故止令罰役耳 湖廣江華等縣強賊廖馬孫等伏誅初馬孫等縱猛人盤伯養等偽稱都副總兵指揮千百戶名號執刀鎗張旗幟焚毀巡檢司官署案牘殺人劫財攻圍富川縣為守禦官軍所敗後攻秀峰寨官軍又敗之遂分處巢穴總兵官蕭授官軍至伯養等前後就擒戮馬孫逃富川山中仍集眾劫殺授累遣人招撫而竊據巢穴岷強不服

至是併其家屬俱就擒械送至京師命悉棄市凡幼男子悉宥之俾隸錦衣衛習匠藝

丙午

行在後軍都督僉事李通奏大營操練圍子手逃逸一千二百人乞令兵部捕之

上曰此軍初皆選精壯者今消耗如此必頭目不能恤又生事苦楚之致亡逸者眾兵部詳究其實來聞自今各營操練軍士逃者頭目如例罰俸 行在通政司奏朔州衛指揮王瑛私役軍卒出烟墩十里為虜寇所執又掠瑛等馬驟出境卒逸歸白



于千戶谷勝勝與瑛等匿不以聞

上曰自古禍亂之興皆由小人苟近利而忽遠慮每以小事為無害隱而不言養癰長疽遂至狼狽今虜寇偷竊雖小事人臣蒙獎乃大惡漸不可長令武安侯鞫之定罪以聞

命行在工部度地建朝天宮於西直門內

丁未

太原府霖雨汾河水溢決隄防傷禾稼鎮守都督李謙巡按監察御史徐傑以便宜督軍民疏通舊河修築堤堰遣人馳奏

上是之

戊申

免陝西寧遠縣積年戶絕及水衝沙漫民人一千四百二十九戶田地一千三百三十五頃四十九畝應納稅糧九千七百四十五石有奇

命行在兵部以馬五百匹給宣府左右前三衛騎士之操神銃者

命行在工部建少師吏部尚書蹇義第宅于文明門之內副總兵都督方以奏內官蕭愚親信小人擅作威福私役戍兵凡諸邊務任意干撓政欲用



神銳悉不與至加詔詈或擅調軍出境

上降勅責愚曰朕以邊務忒委總兵大小事悉聽裁  
決尔但管神銳允進退緩急聽總兵約束何敢越  
分撓法論尔罪當萬死今姑曲宥俾悛改自今惟  
於神機銳嚴密關防一切邊事聽總兵處置尔所  
役軍士即遣歸伍聽調若怙終不悛必誅不釋

己酉

貴州大平代等長官司頭目宋海等來朝貢馬

曉刻太白犯歲星

壬子

宣府總兵官都督譚廣奏近行在戶部以邊儲轉  
運為難令臣止將宣府前衛及興和千戶所官軍  
守備凡諸衛官軍調戍宣府者皆遣還來春屯種  
輸納子粒若宣府前等衛士卒亦須摘撲屯田緣  
臣所守邊地一千四百餘里皆與虜隣雖有城堡  
相去或五六里或二三十里往時寇虜常依險藏  
伏遇雲霧風雪之際輒入為寇因再委都指揮黃  
真嚴切巡邏始有畏忌之心然諸處瞭望常見有  
虜寇往來彼蓋窺伺欲乘間竊發是以晝夜不敢  
怠違况諸軍皆自永樂中調來京今若惜費稍稍



減撤或有警報各固封守所將逐捕能有幾人急欲徵兵遠者七八百里近者三二百里及其來赴賊已引退人困馬乏何能成功今大同遼東皆置重兵而宣府密迤北京尤為要切誠如戶部言臣愚未見其可若不盡言恐負

陛下委託之重

上命行在戶部移文諭廣自永樂中調者如舊今戍守有餘亦須屯種長久之策也 巡按福建監察御史邵宗奏在外諸司文卷皆屬按察司照刷今福建所屬自永樂二十年至今未刷錢糧埋沒刑

名出入何由得知若天下皆然則積弊滋多且令各處按察司遵依成法每年八月分巡刷卷年終則上其藉於都察院戒飭各按察以時舉行 巡按河南監察御史梁廣成言直隸睢陽衛洪武中築城就城內取土遂致地勢低窪每歲或遇久雨及城外西北二湖漲濫流聚城內積久不涸軍民皆徙居城外歷十六年矣而城類虛設乞塞二湖浚舊濠開門以泄積水低處用土培高仍令軍民歸處城內猝或有警可保無虞命行在工部移文河南三司計議行之 夜有流星大如盃色赤尾



跡有光出天樁西北行至雲中

癸丑

罷內官入番買馬初內官李信李貴以西番多良馬請買以供國用既次陝西治行上以地遠勞人勅罷之

甲寅

遣神樂觀舞生賫香幣詣各處命有司祭歷代帝王陵寢

賜琉球國使臣步馬結制等貴州大平代長官司頭目宋海等雲南鎮南州故把事舍人李雍等鈔絲

幣絹布有差 哈密忠順王遣鎮撫早丁等二人奏事至京賜鈔及綵幣表裏等物有差 行在鴻臚寺左少卿張隆奏薊州永平山海等處關營歲用糧料二十五萬三千四百餘石欲令遵化等衛所薊州等州縣發軍民總兵官都督陳敬添撥軍士於林南倉關運貯於遵化永平山海倉以備支用

上從之

命俟秋成後起民夫及於冬營堡撥軍守關者毋擅動



乙卯

以罕東衛班麻思結為指揮使因其自陳征曲先  
有功故授之 巡撫侍郎于謙奏開封府祥符縣  
中牟尉氏扶溝太康通許陽武夏邑八縣去年七  
月黃河泛溢衝決隄岸滄沒官民田五千二百二  
十五頃六十五畝該納秋糧五萬六千八十餘石  
馬草七萬五百餘束乞為除豁從之 南京錦衣  
衛復給指揮千百戶逯原成等二千七百人告言  
俸半折鈔近例令於原籍官司支給緣皆年幼去  
家有千里及二三千裡者道遠不能往支乞援山

後官軍俸例于京庫或附近州縣官庫支給為便  
上諭行在戶部臣曰此孤幼俸鈔安可拘例其令南  
京天財庫支給之順天府寶坻遵化玉田三縣薊  
州鎮朔二衛各奏五月淫雨河水泛漲滄沒軍民  
低田苗稼 夜有流星大如盃色赤尾跡有光起  
天倉東北行至天廩

丙辰

昏刻有流星大如盃色青白尾跡有光出雲中東  
南行至雲中又有一星大如鷄彈色赤尾跡有光  
出造父南行入鯨星又有一星大如鷄彈色赤尾



跡有光出心南行至濁夜有流星大如鷄彈色赤  
尾跡有光出文昌西北行至濁又一星大如鷄彈  
色亦有光出勾陳西北行至北斗杓五鼓有流星  
大如鷄彈色青白尾跡有光出胃東南行入天囷  
宣德七年六月

是月御製官箴成以示百官並命各官讀之  
上諭之曰朕承大寶臨撫兆民實賴中外文武群臣  
同心同力以興起治功昔舜命九官十二牧皆致  
孜孜訓諭虞史書之夫以大舜為君禹稷臯契葦為  
之臣猶致傲如此况朕菲薄敢不究心然遠臣既

不數見而人諭之近臣雖朝夕相接亦不得數以  
言諭因取古人箴傲之義凡中外諸司各著一篇  
使揭諸廳事朝夕覽觀庶幾有傲然古人之君臣  
有交傲之道凡在位君子有以嘉謨告朕者尤朕  
所樂聞也箴凡三十五篇 都督府箴曰

天命

太祖興自武功海宇既寧武備寔崇

皇祖皇考敬繩

祖武兵戎之政總以督府統嗣大統祇率舊章居安  
慮危夙夜不忘惟昔帝王咸奮武衛靖亂保民安



內攘外凡今兵衛布在四方總制于中有紀有綱  
惟是樞機爾司其柄宜敬念之以修其政將有材  
智士有勇銳部伍有訓儲恃有備除治戎器豫戒  
不虞政修兵堅孰敢侮予爾敬念之母忽毋怠必  
壯其猷以輔予治 吏部箴曰周公六卿其長大  
宰統治百僚以熙功載漢設選部官置尚書有佐  
有屬代襲弗渝致治之本寔資用賢甄拔簡任爾  
持衡銓爾惟敬之務公戒私善爾勿蔽才爾勿遺  
必黜儉邪必進忠貞用舍適宜治由汝興苟或貨  
貨弗博詢衆謀面而用弗究其內玉石不分臧否

莫明治之弗興亦由汝成度德定位乃稱任使小  
知大授官罔不他精爾識鑒勵爾正直相予于治  
夙夜無斁 戶部箴曰君國之道子民為先黎庶  
既安邦本植焉相古地官寔爾之職均節惠和民  
乃衣食賦稅有時徭役有常民之所供舊典式張  
惟爾卿佐暨乃攸屬庶幾夙夜恪謹乃服民克阜  
殷樹藝以蕃上下畢充何有卒殫惟公勤惟時惟  
允惟 仁之溥而義之盡秦之商鞅唐之宇文苟  
征暴括邦以不振爾惟暨茲母縱括克母詭于隨  
母敗于墨予惟爾任爾其懋哉尚友古人報德不



回 禮部箴曰聖人立極法天出治為治之本莫  
大於禮稽古伯夷為虞洪宗所典三禮宗伯攸同  
既治神人亦和上下政本之地寔宣教化惟我  
祖宗承古之道品節制度式昭禮教幽明崇卑秩乎  
有序大法大經靡不備舉咨尔礼臣夙夜惟寅秉  
其直清以交神明安上治民爰及四裔祇循舊章  
亦義之比惟卿暨佐汝予協恭暨厥四属于卿卒  
後治國去禮猶耕無耜咸篤敬之以懋政事 兵  
部箴曰部以兵名實古司馬詰是戎兵以固華夏  
凡厥武臣疇過叙勲乘馬在垆考牧用蕃車駕輿

服城戍郵駟守經制宜皆尔之職重之以卿承以  
衆僚簡昇維賢庶其昭昭尔宜懋茲敬共朝夕顧  
謾勿忘以熙庶績書有明訓儆戒無虞茲用教寧  
其可弗圖怠則隳政貪則亂法毋為泄泄毋為沓  
沓職所宜為式克慎修福祿攸集永孚于休思古  
良臣鞠躬尽瘁用是作箴以勵有位 刑部箴曰  
聖人制刑輔治弼教掌邦之禁惟仁之蹈咨尔刑  
部卿佐暨属惟公乃明惟明能燭匪廉弗公勉篤  
于行惟敬惟慎毋忘哀矜死獄求生何昔之德移  
情就律何今之刻深文巧詆寔民之賊如鑑如衡



刑乃弗忒毒威以逞下情鬱堙私意以行枉直失  
真司命之寄毫私罔僻一非擬惟輕庶鮮寃抑天不  
可違民不可調斷不可續應則如嚮徃体予仁欽  
哉勿踰庶幾祥刑有永令譽 工部箴曰虞舜之  
世垂若百工暨于成周乃設司空漢制水衡將作  
少府備物致用必謹其度我朝建官列次六卿率  
屬有四各底于成凡諸繕作儀品有秩辨其楛良  
去華就實凡厥有位宜慎其官順理而治勿苛以  
殘山澤之利羽毛齒革金鑲丹漆暨木與石為所  
當為毋耗于材逸所當逸毋殫其力毋縱已私縱

則召菑毋溺于賄溺則取敗必祗必勤必施以公  
百役具宜惟尔之功其懋敬哉視古仁智率履弗  
愆用保祿位 都察院箴曰歷代建官皆有御史  
任之耳目委以綱紀糾違繩愆激濁揚清用猷嘉  
言惟直與明祖宗之制有長有二其下之屬凡十  
有四敷達民隱察舉官邪必究大体毋刻毋頗必  
由中道毋過不及毋以賄遷毋以勢懾敦仁之存  
篤義之行冰霜之清松栢之貞凡尔憲臣敬慎以  
勗庶幾朝政資尔以肅煊姍緘默徒取克位職是  
用弛國則何賴必端諸心必修諸已庶懋尔績庶



輔予理 太常寺箴曰為國之要事神理民太常  
典祀式交百神昔予

祖考致嚴祀享厥有純誠敬恭協相朕承丕緒思用  
允迪尔祗尔肅以輔以翼儀度必飾粢盛必潔無  
黷無慢凜乎對越事神之本惟心之勤豈直臨事  
平居有嚴神之鑒矣來歆來止神之歆矣民之福  
矣無曰冥冥洋洋有臨汝惟懋哉其慎其欽 大  
理寺箴曰有虞用士彌教明刑奏漢相繼廷尉是  
稱命曰大理繇景之世暨于今茲一以輔治列之  
九卿有翼有承鑑空衡平視獄之成簡于五辭以

正刑罰維過斯宥維義之合刑不可贖死不可生  
惟尔是憑其可不矜易著明慎書戒欽恤祗率弗  
違乃德之吉惟官惟反惟貨惟來終迷不復乃禍  
之階粵昔蘇公式敬由獄以長王國永命攸屬嗚  
呼若人悠悠我思尔儀尔規服此戒辭 通政司  
箴曰通政所司寔古納言出入政令用名厥官有  
虞之聖后龍是職周仲山甫亦謹朝夕君為元首  
臣則股肱薦念如子維下維氓崇卑一氣流貫無  
間有過弗流体乃為患尔職于斯必敬必忠命必  
下究情必上通諛說殄行師用震驚尔詳尔明予



治乃成誰樞維機維喉維舌爾飾無怠庶儆在例  
詹事府箴曰堂堂鴻業萬世攸傳儲副之建大  
本在焉咨爾詹事爾其毗輔有二有承庶職咸具  
虞舜之聖資于臣隣矧時育德而弗資人言行政  
事有体有要必謹大猷必以辰告譬如陟崇由下  
而升不怠以休乃躋高明爾其敬共以引以翼毋  
為憚倭毋肆諛慝示爾箴規篤念勿忘克用有成  
邦家之光 翰林院箴曰廷有司言自周則然後  
世罷用愈密而重策命所出講學所資機務之嚴  
于度于咨代有賢哲博聞明識克勵翼之用光厥

職咨爾儒臣朝夕左右必端乃志必慎乃守啓沃  
之言惟義與仁堯舜之道鄒孟以陳詞尚典實浮  
薄是戒謀議所屬出必乎外心存大公罔役于私  
昔人四禁汝惟勵之獻納論思以匡以益以匹前  
休欵哉無數 左右春坊箴曰國之大本厥惟儲  
嗣天序所屬人心攸繫用輔厥德必于正人左右  
春坊惟其輔臣儲君之德曰仁與義食息言動惟  
道之比堯舜周孔是究是明百度以貞其德乃成  
玉資琢磨乃薦廟宗豈其賢才不由輔導爾端爾  
行爾正爾心非聖不道其慎其欵大經大猷是匡



是直國有元良惟尔之績 司經局箴曰聖人之  
道具載經籍用理萬邦用凝庶績國有儲副天下  
之本惟德之修惟道之盡凡厥典冊尔寔司之尔殫  
尔心尔正尔思堯舜之道惟曰仁義廓而堯之萬  
善斯備雜家者流反道自賢孟軻敬王不陳于前  
尔其監茲祇乃攸服日就月將是咨是沃道積厥  
躬而政于中克績其隆時乃之功曲學阿世古人  
所戒篤慎勿妄庶幾無悔 六科箴曰國家建官  
內外有制給事之臣密迓廷陛爰準六典分科置  
員各司其務有簡有繁命令之出于汝紀之章奏

之入于汝度之考其得失舉其愆戾釐革欺弊以  
贊于治敬共識一朝夕無縱以逸無易以忽必恭以  
密達識大体由乎至公維汝之賢光奮于庸怙威  
以騁不率正道汝之不賢辜亦自造自昔迓臣左  
右承弼正人是資邪佞必斥其篤念哉毋苟充位  
往端乃志以懋乃事 光祿寺箴曰周官膳庖實  
肇光祿漢列九卿唐總四屬國朝建置率循弗易  
享祀賓燕咸其所取先王之禮豐儉有宜惟敬惟  
誠儀式行之粢盛必備犧牲必潔執事有恪儼乎  
對越群賢在朝四裔會同廩之餼之必精必豐朝



夕饔餼必謹恒度毋儉公費而縱私餽毋騁奢侈  
毋肆暴殄毋作愆過以昭常典正己率下咸敬慎  
之用永終譽光戎訓辭 鴻臚寺箴曰祈祈萬邦  
咸統于一朝觀會同其儀有秩咨爾鴻臚卿二暨  
屬時維爾官必莊以肅必考于度必協于中無簡  
無繁周旋雍容惟勤以周惟一靡慝敬慎爾儀庶  
光爾職 太僕寺箴曰軍國之用馬為之最軍國  
之政馬政亦大肆予慎之有馭如雲暨充內閑亦  
渙其群疇厥民庶析之畜牧司其政令命爾太僕  
政令攸宜閱省以時不愆不忘乃蕃乃滋蚩蚩之

既國家之本既既阜豐馬息斯奮爾篤于民毋侵  
毋刻爾勤于職必敬乃德魯僖無邪衛文塞淵爾  
師古人厥功茂焉 國子監箴曰翼翼京都巖巖  
學宮首善之地是維辟雍四方髦士來游來學業  
之所專詩書禮樂學必有師為士承式祭酒司業  
暨乃衆職師道克惇士乃有成俊乂奮興為國之  
禎咨爾為師敬爾儀則以教以率罔懈朝夕咨爾  
為學明善誠身充智與能匪敬弗臻俗化所自賢  
才所出其于國家甚重而切勗爾師生咸篤于成  
無忽于行式觀厥成 欽天監箴曰五帝之世曆



象肇興建官作式後世承襲惟我

祖宗德合堯舜天道民事尤篤欽慎爾職于斯夙夜  
惟寅用率厥屬戒致其勤必精推策必審觀候庶  
副欵若爰及敬授行奉天道動協時宜在予靡愆  
實汝之資惰慢而失灾咎而隱予則汝罰勗哉惟  
謹 京府箴曰奕奕京師四方所瞻京尹之職民  
庶是誠周之內史漢之三輔不輕畀人擇賢以付  
國家因之有尹有丞亦有庶僚用贊厥成芒芒區  
域輦轂其本王者施仁篤近舉遠爾体予懷務勤  
與周情必上通澤必下流水清玉剛準平繩直毋

憚豪右毋縱奸慝趙張邊延顯顯前規毋愧古人  
祇我訓辭 行人司箴曰法古建官以熙于治因  
之行人寔承周制慎簡髦士俾居俾臧朝有命令  
肅肅用將有容有章必敬必飭毋為奇表毋縱貪  
墨載馳載驅用爰咨諏靡及之懷益恣弗渝克篤  
念茲不忝于士不忝于國有聞于世 錦衣衛箴  
曰自古建國皆重環衛爾維厥官朝夕廷陞予所  
服御咸爾攸秩出入先後以警以蹕左右駿奔亦  
戒不虞亦有匪人爾詰爾祛爾其懋恣勿縱于私  
宜廉宜慎宜勤宜祇惟義之遵惟善之迪敬恭勿



渝用保終吉 中都留守司箴曰洪惟

太祖龍飛之初睽時舊邦肇作中都官府既備兵衛  
斯設留守之司或記有截戔戔皇陵奕奕寢園是  
保是完既固既安惟勲與賢爰副簡畀洋洋

聖謨式篤於此凡爾庶僚受職寔同率厥攸屬秉其  
虔恭嚴乃部曲飭乃士伍有愛有威以訓以撫惟  
皇聖明於昭于天來遊來觀尚敬慎旃 各都指揮  
司箴曰維聖制兵職以衛民股肱既強國勢用振  
惟都指揮以總諸衛戎政是專乃古連帥內藩朝  
廷外固封疆上下相維有紀有綱率厥攸屬小大

維服以親戎行俾安俾育維屯維守政之所宜居  
安慮危訓勵以時勇智信嚴仁則為大毋縱貪戾  
毋肆暴害維昔艱難爾臻茲尚慎旃哉保終勿隳

內外諸衛箴曰兵衛之設以居師旅內以宿衛  
外以禦侮必有成功以統以帥齊其部位明其紀  
律簡閱練習兵甲堅利養威藏銳用則有備為將  
之道勇智兼全為士有教桓桓奮先將之于士必  
隆恩撫矜其寒飮同其甘苦毋慮與苛侵奪厥利  
仁如兄父愛其子弟以之赴敵必得死力豈直輔  
功亦濟危厄凡古良將罔不率茲爾篤念之無忽



無違飭尔也務兵食所賴修尔兵政以清境內祇  
我訓辭懋尔功庸庶幾祿位光被承終各布政  
司箴曰國有方岳統治列郡克舉其綱紀斯不紊  
舜命牧伯農時為先柔遠能迓惇德克元咨尔藩  
臣徃欽汝職惟誠無斃克熙汝績承流宣化夙夜  
念哉謹其操持端其表儀郡守邑令有賢有否明  
其廉察公其去取維予夙夜求民之瘼為藩為輔  
維仁之度生息有養禮讓有興尔政之成式觀厥  
能按察司箴曰國家養民藩牧是寄必有憲臣  
乃肅乃又提刑按察厥署以民有使有長有二有

丞北而藩垣下而郡邑廣聰達明無或弗及鋤姦  
戢暴去頑革器用植善柔用暢鬱堙以義行仁以  
刑弼教豈曰今茲亶古之道法以防人必自尔躬  
表之克端影靡弗從毋怠于戕毋敗于度毋權之  
懾毋勢之怙吐剛茹柔或私滅公維身之辜維家  
之凶明明上天臨下有赫徃敬尔德以懋尔績  
各府箴曰列郡有守民之司牧有佐有幕協恭教  
育邦國之本寔惟其民教之育之一主於仁千里  
之地膺受朝命安危休戚一係厥政耕桑之業毋  
奪其時督之勸之民罔饑寒學校之政必修必飭



無慢無怠善教斯植正其範防去其蠹蠹所惡勿  
施所歆與聚循典祇祀以為民福禮賢尚德以勵  
民俗奉法循禮為下表儀廉公以明政乃弗疵豈  
弟君子民之父母慎哉欽哉用終永譽 各州箴  
曰環境千里置府以治州亞於府建官次之有臨  
乎上有仰乎下凡尔所職承流宣化蚩蚩者氓休  
戚在尔心誠求之如保赤子無妨其穡乃衣乃食  
無殫其力乃休乃逸興舉學教敬恭神祇獄訟必  
平賦稅必時毋縱民厲毋侈貨黷維仁維清如冰  
如玉如繩之直如鑑之明豈弟君子懋永令名

各縣箴曰人君代天子養兆民任牧民者邑令尤  
親丞薄佐令幕有贊畫民之休戚咸其所職保民  
之方心誠求之如父與母字厥孩提察其凍餒俾  
衣俾食恤其疾痛俾康俾適既厚其生必道其行  
有禮有儀善俗用興致恭神祇致勵學校毋肆侵  
漁毋縱苛暴尔端尔心務恪與誠政用有成民用  
底寧 王府官箴曰宗室之親各有封國用作藩  
屏必建輔弼藩三之惠惟忠與孝惟善之存惟仁  
之貽輔之弼之如古名賢非聖之書弗陳於前進  
王於道維汝之勛苟納於邪汝則于辟維漢賢藩



東平河人<sup>間</sup>心之善古今同然汝贊王德克濟乎是  
將<sup>古</sup>汭顯聞亦揚於世 監運司箴曰賊<sup>盜</sup>艦之利興  
自古<sup>昔</sup>者下以惠民上以資國歷代暨今置吏以監  
克用成功必材與廉歛發有制私竊有禁尔寔司  
之無忝厥任尔篤于公貿遷乃通尔忠無倦財賦  
乃饒衍尔之攸職是名利權利不自濡汝允其賢  
維身與名臆利則敗其求保之無忝訓戒 儒學  
箴曰君國子民教之育之有育無教或淪於夷置  
吏俾育建學俾教為教之方本乎師道清修實踐  
正學博聞成已成物師道用尊為學之方体仁由

義誦法周孔亦致文藝化民成俗以善其鄉成德  
達材以資于邦本末循序用臻實效勗尔師生毋  
忝學教







